

Carta nachindahá Pablo nuú na cúu cuéntá Jesús ndúu ñuu Roma

Cáhan Ndióxi Pablo xihín na cúu cuéntá Jesús

¹ Yehe cúu Pablo ta Jesucristo cúu xitoho i. Naçaxi Ndióxi yehe cacuu u in apóstol cuéntá mé á ta nachindahá a yehe cuhun i çahan i tuhun vaha saha Jesús nuú ñayivi.

² Sanahá ndivaha naçaja Ndióxi ña ná çahyí na profeta mé á tuhun vaha sahá ini libro yij Ndióxi.

³ Mé tuhun vaha yóho çahan saha Jesucristo, xitoho í, mé a cúu in túhún jini já jahyi Ndióxi. Ta nanduu a in ñayivi naçacu ñuyiví yóho ta naquixi a chichi rey David.

⁴ Ta najánaça ínimá yij Ndióxi ñayivi ña cúu Jesús in túhún jini já jahyi Ndióxi, mé a cúu cája tóco ndihi ñaha. Jáchi tá sa naçihí Jesús já nanditacu tucu a ta xihín ña yóho náha ña cúu á in túhún jini já jahyi Ndióxi.

⁵ Ta sahá ña naçaja Jesucristo ndica crúxu sahá ña yóho naçaja Ndióxi ñamaní xihín ndihí. Já nachindahá Ndióxi mí ña ná cuhun í cuéntá mé á çahan í saha Jesús nu tóco ndihi ñayivi ndúu ñuyiví já ná cuu candeé ini na mé á ta já ná çaja na ña cúni a.

⁶ Ta mé ndó, na cúu cuéntá Jesús ndúu ñuu Roma jan, naçaxi Ndióxi ndohó cacuu ndó cuéntá mé á.

⁷ Ña cán queá çahyí i carta yóho nu ndó, na ndúu ñuu Roma jan. Jáchi cúni ndivaha Ndióxi ndohó

ta naçaxi a ndohó nduu ndó ñayivi mé á. Ta ná caja Ndióxi, tátá yo xihin Jesucristo, xitoho í cuahá ñamaní xihin ndo ta ná caja ña ná coo vaha ini ndó.

Cúni Pablo cuhun da ñuu Roma coto nihni da na cúu cuéntá Jesús ndúu cán

⁸ Ndiqiahva i ndixahvi nu Ndióxi sahá ña naçaja Jesucristo xihin in in ndó jáchi ñayivi ndúu ndijáá ñuyívi xini johu na ña cándéé ini ndó Jesús.

⁹ Yehe cája chúun i cuéntá Ndióxi ta ndinuhu ini i cáxi tuhun i tuhun vaha saha Jesús, mé a cúu in túhún jini já jahyi Ndióxi nuú ñayivi. Ta xini vaha Ndióxi ña tóco ndihi quivi xica tahvi i nu mé á sahá ndihi ndó.

¹⁰ Ta ndijáá ní quivi xica tahvi i nu Ndióxi ña ná quiahva ñamaní nuú i saa i jan coto nihni i ndohó tá cúni a.

¹¹ Jáchi cúni cuni i ndohó já ná çaxi tuhun i xihin ndo ndá quiahva cúni ínima yii Ndióxi caja ñamaní xihin ndo já ná ndindacú chága ndó cuéntá mé á.

¹² Ña cúni quéa ná quiahva tuhun ndeé ini táhan í jáchi in cándéé ini ndihí Ndióxi.

¹³ Cúni ña ná candaá ini ndó, ñani mí i, na cúu cuéntá Jesús ña sa cuahá tañu sácu ini i saa i coto nihni i ndohó joo ín cuahá ña sáji nuu nuú i sahá ña cán quéa cámani saa i jan. Cúni chindeé e ndohó ña ná caca vaha ndó íchi cuéntá Jesús. Jáchi quiahva já nachindeé e java ga ñayivi, na co cúu chichi Israel.

¹⁴ Joo ndítahan nuú i çaxi tuhun i tuhun Ndióxi nu tóco ndihi ñayivi ndúu ñuu náhnu xihin na ndúu yucú ñuhú. Ta çahan i tuhun Ndióxi xihin na ndíchí jini ta xihin na co ndíchí jini.

15 Ña cán queá xíca ndivaha ini i saa i nu ndúu ndó ñuu Roma jan cahan i tuhun vaha saha Jesús xihin ndo.

Jáçacu Ndióxi ñayivi sahá tuhun vaha cáhan saha Jesús

16 Co cáchan nuú i sahá tuhun vaha cáhan saha Jesús jáchi cúú á ndée Ndióxi jáçacu a tóco ndihi ñayivi, na candeé ini mé á. Ta jihna ñuhú naçasahá Ndióxi jáçacu a ñayivi naquixi chichi Israel ta viti jáçacu a tóco ndihi ñayivi tá candeé ini na mé á vatí cúú ná na tóho á cúú ná na Israel.

17 Jáchi náha tuhun Ndióxi nu yo ndá quiahva ndúu ñayivi ndaa nu mé á. Ta cúú á sahá ña candeé ini mé á ta sahá ña yóho cuití va jáchi coó a inga nuú ña caja í cacuu ñayivi ndaa nu Ndióxi. Já cáchi tuhun Ndióxi já: “Ndá na cúú ñayivi ndaa nu Ndióxi catacu na sahá ña candeé ini na mé á.”

Tóco ndihi ñayivi ndúu ñuyíví cómi na cuachi nu Ndióxi

18 Janda indiví nu íin Ndióxi xójo ini a xihin tóco ndihi ñayivi cája cuachi ñuyíví yóho ta jándoho a ini na sahá cuachi cája na. Ta sahá ña núu cája na sáji nuu na nuú java ga ñayivi, na cúni candaá ini ña ndaa saha Ndióxi.

19 Jándoho Ndióxi ini ñayivi sahá cuachi cája na jáchi sa najánaha mé á ña ndaa nu ná ta sa xini na saha mé á joo co cándusa na ña.

20 Janda sahá ñuyíví xini ñayivi ña naçavaha Ndióxi ñuyíví xihin indiví xihin tóco ndihi ñaha. Ta xihin ña yóho cuu candaá ini na ña íin Ndióxi ta cuu candaá ini na ña íin ndée mé á caja ña cúni a anda

ama cáa quiví. Sahá ña cán quéa a cúu cachi na ña co xíní na á ín Ndióxi á coó a.

²¹ Vatí cándaã vaha ini na ña ín Ndióxi joo co cája cáhnu na mé á tátuhun ndítahan nu ná caja na. Ta ni co ndíquiahva na ndixahvi nu á. Ña cája na quéa cáhvi núu ini na ta coó saha toho ña cáhvi ini na. Ta cúu ná tátuhun ñayívi tóntó jini, na xíca nuu nuú naá yávi.

²² Ta vatí cáhí na cúu ná na ndíchí jini joo cúu ná na tóntó jini.

²³ Najándacoo na ña cája cáhnu na Ndióxi, mé a tácu anda ama cáa quiví ta nacavaha na tiniñu yúu ña ñehe nahná taa, da xíhi yachi. Ta nacavaha na nahná laa xihín nahná quití xihín nahná coo. Ta nacasáhá cája cáhnu na ña.

²⁴ Sahá ña cán quéa najándacoo Ndióxi na ña ná caja na tá nuú ña núu ña cúni na caja na. Anda jávi nacasáhá na cája quini na xihín yiquí cuñu táhan na.

²⁵ Co xeén na candúsa na ña ndaa cáhan saha Ndióxi joo nacandúsa na ña tuhún. Ta nacaja cáhnu na ña nacavaha Ndióxi ta coó nacaja cáhnu na mé Ndióxi, mé a nacavaha tóco ndihí ñaha. Jáchi Ndióxi quéa xíní ñúhú caja cáhnu í anda ama cáa quiví. Já ná coo.

²⁶ Sahá ña cán quéa najándacoo Ndióxi na ña ná caja na ña xíca ini na caja na, ña co ndítahan caja na. Ta naxinu na janda nuú najándacoo najihí ña quíji na xihín yí na ta já nacasáhá quíji xihín táhan ndaja jíhí mé va na. Ta ña yóho cúu á ña coó nasacu ini Ndióxi caja na.

²⁷ Ta quiahva já nacaja ri dataa. Najándacoo da ña quíji da xihín ñájihí da ta nacasáhá ndicají ini da

caja da ña núu xih̄in táhan mé va da janda quiahva ñacasáhá quíji xih̄in táhan mé dá. Chí nuú cacahan nuu yo quéa cája xih̄in táhan da. Ta tá ñandihi já cásáhá ndóho ini yiquí cuñu na sahá ña núu cája na.

²⁸ Naxinu na nuú najándacoo xóo na Ndióxi ta cō cūni ga na candaā ini na sahá. Sahá ña cán quéa najándacoo xóo Ndióxi na ña ná cahvi núu ini na ta já cája tá cája na ña cō ndítahan nu ná caja na.

²⁹ Nandicutú ndaa ínimā ná xih̄in tá nuú ña núu, ña cúu cuachi. Ta ndiáva íni na quehe na ñaha cómi inga ñayivi ta cája xíxi na xih̄in ná ta cáhiv̄i ini na ta sáhn̄i na nd̄ii ta cáni táhan na ta jándahvi na ñayivi ta cáhvi núu ini na sahá inga na ta xíca nuu na cáhan túhún na.

³⁰ Ta cánahá quini ndivaha na xih̄in inga na ta cándají na Ndióxi ta yáha yúhu na xih̄in inga na ta cája ich̄i ini na ta cája cáhnu na mé va na. Ndiáva íni na ndaja caja chága na cuachi ta sáa ini na caja na ña cūni tátá náná na.

³¹ Cō xín̄i túni na ta cō jáxinu cōo na tuhun sáhan na nuú ñayivi. Cō quíhv̄i ini na ñani táhan na ta cō cája cáhnu ini na saha ná ta cō táhnda ini na sahá ñayivi.

³² Xín̄i vaha na ña ñasahnda Ndióxi nu ná ta xín̄i na ña ndítahan quivi na sahá cuachi cája na. Vati cándaā ini na ña yóho joo xih̄in ndinuhu ini na cája tá cája na ña núu. Ta janda cájii ini na tá cája java ñayivi mé ña núu.

2

Caja vii Ndióxi saha tóco ndihi cuachi

¹ Mé a ndaa cómi ndó cuachi nu Ndióxi. Sándehé ndaa ndó inga ñayivi sahá cuachi cája na joo

chícaan ndó cuachi jata mé va ndó jáchi cája ndó mé cuachi cán.

² Sa xini vaha í ña cája ndaa Ndióxi tá jándoho á ini ñayivi sahá cuachi cája na.

³ Mé ndó sándehe ndaa ndó cuachi cája java ga ñayivi ta cáhán ndo vaha cája Ndióxi tá chindahá na cuhun na indayá. Joo cáhán ndo ña caja cáhnu ini a saha mé ndó vatí cája ndó mé cuachi cája na cán.

⁴ Ndája núu ndó Ndióxi, mé a cuni caja cuahá ñamaní xihin ndo jáchi xini ndó ña co jándoho yachi Ndióxi ini na cája cuachi. Cuni Ndióxi ña ná ndicó coo ini ndó jándacoo ndó cuachi cája ndó.

⁵ Ihvi ndivaha cúu ini ndó jáchi co jándacoo ndó cuachi cája ndó. Nandicuahá cuachi ndó ta jándoho chága Ndióxi ini ndó tá ná tandaa quivi caja vií a sahá cuachi nacaja ñayivi. Mé quivi já ndaca náha ña cojo ini mé á saha cuachi ñayivi ta náha ña ín saha mé á jándoho a ini na cán.

⁶ Mé tiempo cán quiahva Ndióxi nuú in in ñayivi ña ndítahan nu ná ndiquehe na sahá ña nacaja na ñuyivi yóho.

⁷ Java ñayivi nacaja na ña vaha xihin ndinuhu ini na ta nacacuni na caja na ña ná cajii ini Ndióxi xihin já ná cachi Ndióxi ña cúu ná ñayivi vaha. Ta nacacuni na coo na nu ín Ndióxi anda ama cáa quivi. Ta mé na cán cúu na cuhun coo xihin Ndióxi anda ama cáa quivi.

⁸ Joo cojo ini Ndióxi tá jándoho a ini na sáa ini, na co cuni cuhun xoo ña ndaa jáchi cátóo na cuhun na xoo ña núu.

⁹ Ndoho ndivaha ini tóco ndihi ñayivi cája cuachi ta cacuéha ndivaha ini na. Jihna ñúhú na naquixi chichi Israel ndoho ini já casahá ndoho ini na coo

naquixi chichi Israel.

¹⁰ Joo cajji ini Ndióxi xihín na cája ña vaha ta ndaja cáhnu a na ta caja mé á ña ná coo vaha ini ná. Jihna ñúhú já caja mé á xihín na naquixi chichi Israel já casáhá caja ri a já xihín na coó naquixi chichi Israel.

¹¹ Jáchi co cúú á tátuhun cúni Ndióxi in ñayivi ta cándají a inga na jáchi in cúú ndihi ví nu Ndióxi.

¹² Vatí co cándaá ini ñayivi ña sáhdá ley Moisés joo cuhun tá cuhun na indayá sahá cuachi nacaja na. Ta vatí cándaá ini ñayivi ña sáhdá ley Moisés joo cuhun tá cuhun na indayá sahá cuachi nacaja na.

¹³ Jáchi tá cándaá ini na ña sáhdá ley Moisés ta co cája na ña jáchi co cáchí Ndióxi ña cúú ná ñayivi ndaa nu mé á. Ta tá cája na ña sáhdá mé ley Moisés anda jáví cáchí Ndióxi ña cúú ná ñayivi ndaa nu mé á.

¹⁴ Ñayivi, na coó naquixi chichi Israel co xini na ña sáhdá ley Moisés. Cája mé ná ña sáhdá ley Moisés jáchi já xinu ini na caja na ña vatí co xini na mé ley Moisés.

¹⁵ Ña cája mé ná náha nuú ñayivi ña nasacu Ndióxi ley mé á ini xini túni ná. Ta xihin xini túni ná cándaá ini na tá cája na ña vaha á tá cája na ña núu. Ta quiahva já xihin mé xini túni ná xini vaha na á cája na cuachi á cája na ña vaha

¹⁶ tá ná xinu quiví quiahva Ndióxi chuun nu Jesucristo caja vií a sahá ña nacaja tóco ndihi ñayivi vatí nacaja jehé na ña. Jáchi já cáhan tuhun vaha saha Jesús ña jánaha i nu ndo.

Na naquixi chichi Israel cándusa na ley Moisés

17 Ta mé ndó cáchí ndo cúú ndó na naquixi chichi Israel, na cándúsa ley Moisés. Ta cáchí ndo cája chága Ndióxi ñamaní xihin mé ndó a juú ga xihín java ga ñayivi.

18 Ta cáchí ndo ña sa xini ndó ña cuni Ndióxi caja ndó ta cáchí ndo ña sa xini ndó caxi ndó ña vaha jáchi sa najácuaha ndó ley Moisés.

19 Ta cáchí ndó tiahva vaha ndó chindeé ndó ñayivi ña ná ndihvi na íchi Ndióxi ta cáchí ndo ña cúú ndo tátuhun in lámpara jándiyéhe nuú ñayivi xica nuu nuú naá.

20 Ta cáchí ndo ña tiahva ndó jánaḥa ndó nuú ñayivi, na co xini túni ta cáchí ndo ña tiahva ndó jánaḥa ndó nuú ñayivi, na cámaní catacu vaha ini. Cómí ndo ley Moisés sahá ña cán quea cáhan ndo xini ndó tóco ndihi ña ndaa xihin tóco ndihi ñaha.

21 Mé ndó jánaḥa ndo ley Moisés nuú ñayivi joo jihna ñúhú ndítahan caja ndó ña. Mé ndó jánaḥa ndó nuú ñayivi ña a váha toho caja cuihná na joo cúú ndó na cuihná.

22 Mé ndó jánaḥa ndó nuú ñayivi ña a váha toho coo in ta xihin in ñáñáha, ña co cúú ñájíhí da joo íin ndó xihin ñájíhí inga na. Mé ndó co cuni ndó yoco ndindojo veñuhu ñayivi, na coo naquixi chichi Israel joo cája cuihná ndo ña cuiá ñúhu veñuhu na cán.

23 Cája cáhnu ndó mé va ndó jáchi cómí ndo ley Ndióxi joo co cája cáhnu ndó mé á jáchi co cuni ndó caja ndó ña sáhdá mé ley.

24 Ña cán quea ndaa cáhan tuhun Ndióxi saḥa ndó tá cáchí a já: “Ñayivi, na coo naquixi chichi Israel cáhan núu na saḥa Ndióxi sahá ña cája mé ndó, na Israel”, cáchí tuhun Ndióxi.

25 Tá cája ndó ña sáhndá ley Moisés já quéa ndíyahvi marca nachicaan na yiquí cuñu ndó. Joo tá cō cája ndó ña sáhndá ley Moisés já quéa cō ndíyahvi toho marca nachicaan na yiquí cuñu ndó.

26 Na cōo naquixi chichi Israel cō chicaan toho na mé marca jan yiquí cuñu na joo tá cája na ña sáhndá ley Moisés já ndiquehe Ndióxi na tá quiahva ndiquehe ri mé á na íin marca yiquí cuñu.

27 Ndá na cája ña cáchí ley vatí cōo naquihvi marca yiquí cuñu na, íin sahá na cán chicaan na cuachi jatá na cō cája ña cáchí ley vatí íin a nu ná ta naquihvi marca yiquí cuñu na.

28 Ña cán quéa tá ná caja in na naquixi chichi Israel mé costumbre ña ná cuni cuití va ñayivi ña já quéa a juú ña ndaa ña cúu ná cuéntá Ndióxi. Ta ndá na chicaan na marca yiquí cuñu na cō cája na mé costumbre cuéntá yiquí cuñu cuití va na.

29 Ta ndá na naquixi chichi Israel tá mé a ndaa cúu ná cuéntá Ndióxi ta cája na ña cúní mé á cō cúu á sahá ña nasahnda loho na yiquí cuñu na. Cúu á sahá ña nacaja ínimá yii Ndióxi ini na. Ta mé na cán jácavatá na ini Ndióxi jáchí xihín ínimá yii mé á cája na ña cúní mé á.

3

1 Sahá ña cán quéa ná ndaca tuhún i ndohó ña yóho: Á íin cuahá chága sahá ñayivi naquixi chichi Israel a juú ga sahá java ga ñayivi. Á ndíyahvi nu Ndióxi ña nachicaan na marca yiquí cuñu na.

2 Ajan. Íin cuahá sahá ñayivi naquixi chichi Israel ta tá nachicaan na marca yiquí cuñu na ndíyahvi a nu Ndióxi jáchí nasacu ini a jándacoo a

tuhun a nuú na naquixi chichi Israel já ná cacomí na cuénta sahá.

³ Ta vatí ná caja java ñayivi, na cándéé ini mé á ña co cúni mé á caja na joo ama sahá ña cán a ndíjama toho Ndióxi jini á ña ná caja ña núu xihín ná, vaha.

⁴ Co cája toho Ndióxi já. Ña cája Ndióxi níi tiempo cúu ndinuhu ña ndaa vatí tóco ndihi ñayivi cáhan na ña tuhún. Já cáchí tuhun Ndióxi já:

Xihín tuhun cáhan Ndióxi cándaa iní ña cúu á Ndióxi ña ndaa ta a cúu quee vaha na chícáan cuachí jíquí jatá jáchi cúu mé á in Ndióxi ndaa, já cáchí tuhun mé á.

⁵ Ta viti ná cáhan i xihín ndó tá quiahva cáhán ñayivi ñuyíví. Cáhán na ña co cája vaha Ndióxi tá jándoho a mí sahá cuachí jáchi xihín cuachí jándindita jíco chága yó Ndióxi. Ta xihín ña cája í náha ña cúu Ndióxi in Ndióxi ña ndaa ta mí cúu yó ñayivi cuachi.

⁶ Joo co cáhán vaha na jáchi tá co cája ndaa Ndióxi, nduu já quea a cúu caja víi mé á sahá ndihi cuachi cája tóco ndihi ñayivi ndúu ñuyíví.

⁷ Já cáchí ñayivi já: “Cóho ná caja yó cuachi já ná candaá chága ini ñayivi ña cája ndaa Ndióxi ta xihín ña yóho caja cáhnu chága na mé á”, cáchí na. Joo co cáhan vaha na jáchi tá cáhán yo ña xihín cuachi cája í ndicáhnu chága Ndióxi já quea co cándaa iní ndá saha quea jándoho Ndióxi ini ñayivi sahá cuachi na.

⁸ Joo java ñayivi cáchí na: “Cóho ná caja í cuachi já ná caja cáhnu ini mé á sahá cuachí já ndicáhnu chága Ndióxi”, cáchí na joo co cáhan vaha na. Ta java ñayivi cáhan ihvi na sahá yehe ta chícáan na cuachi jatá i ta cáchí na ña jánaha yehe ña yóho

nuú ñayivi. Ndítahan jándoho Ndióxi ini tóco ndihi ñayivi, na jánaḥa ña yóho.

Tóco ndihi ñayivi ndúu ñuyiví cómi na cuachi nu Ndióxi

⁹ Ña cán quéa a cuú cachi yó ña cúu mí na vaha chága a juú ga inga ñayivi sahá ña naquixí chichi Israel. Jáchi sa najánaḥa i nu ndo ña mí, na naquixi chichi Israel xihín na coó naquixi chichi Israel cúu yó ñayivi cája cuachi.

¹⁰ Já cáchi tuhun Ndióxi já:

Coó toho ni in ñayivi cája ña ndaa.

¹¹ Ta coó toho ni in na cándaḥa ini ña ndaa, ta coó ni in na ndínducú Ndióxi.

¹² Naçaxoo na nu Ndióxi já naquehe na ichí núu cuahaḥa na.

Coó ñayivi cája ña vaha janda ni in túhún na coó.

¹³ Quini ndivaha yúhu ná jáchi cúu á tátuhun in yávi ndii ña cámaní ndee ñúhu.

Cúu ná ñayivi túhún ndivaha.

Tá quiahva cája coo tá tín rí ñayivi já cája na cán tá cáhaḥa na ña tuhún.

¹⁴ Ta mé cháhan cuití cáhaḥa yúhu ná ta xihín ña yóho játaḥvi na ini ñayivi.

¹⁵ Níi tiempo ndícají ini na cahní na ndii ta xihí ndii cája na.

¹⁶ Ta ndá nu xínu na jándoho na ini ñayivi jándacoo ndáhvi ñahá na.

¹⁷ Ta co xini na ndá a quéa canduu vaha na xihín ñayivi.

¹⁸ Ta ni co cándaḥa ini na ña ndítahan nu ná cayihví na Ndióxi, cáchi tuhun Ndióxi.

19 Sa xini yó ña ndítahan nuú na Israel caja na tóco ndihi ña sáhdá ley Moisés jáchi cúú á cuénta na naquixi chichi Israel. Ta xihín ña yóho chícaan ley Moisés cuachi jata mé na cán ta náha ña tóco ndihi ñayivi ndúu ñuyíví cómi na cuachi nu Ndióxi ta a cuú cachi na ña co cómi na cuachi.

20 Ni in ñayivi a cúu nduu ndaa na nu Ndióxi sahá ña cája na tóco ndihi ñaha sáhdá ley Moisés. Ña cája mé ley quea ña ná candaa iní ña cómi yo cuachi nu Ndióxi.

Jácaqu Ndióxi mí jáchi cándéé iní mé á

21 Viti jánaña Ndióxi nu yo ndá quiahva nduu ndaa yo nu mé á. Ta jári cáchi mé ley xihín na profeta sahá ña yóho. Ta co cúú á sahá ña cája í ña cáchi mé ley

22 joo sahá ña cándéé ini ñayivi Jesucristo já cája Ndióxi ña ná nduu ndaa na nu mé á. Já caja mé á xihín tóco ndihi na cándéé ini Jesucristo jáchi tá quiahva cája Ndióxi xihín na Israel quiahva já cája ri a xihín na co cúú na Israel.

23 Tóco ndihi ñayivi cómi na cuachi nu Ndióxi ta nacaxíca na nu á ta a cuú nduu na ñayivi vaha tá quiahva cuni mé á.

24 Joo nacaja Ndióxi in ñamaní cáhnu xihín yo já ná nduu ndaa yó nu mé á. Ta coo nachahví sahá jáchi nachahvi Jesucristo sahá cuachí tá naxihi a ndica crúxu. Ta viti co cómi ga yó cuachi nu mé á.

25 Nachindahá Ndióxi Jesucristo ña ná cuíta nij a sahá cuachí já ná cuu caja cáhnu ini Ndióxi saha yo tá ná cándéé iní Jesucristo. Xihín ña yóho náha ña cúú á in Ndióxi ndaa. Tá cámaní quivi Jesucristo

sahá cuachi já cóo naquehe Ndióxi cuéntá sahá cuachi. Já nacaja mé á jáchi cáhnu ndivaha ini a.

²⁶ Ta xihín ña yóho náha ña mé a ndaa táhyí cúú á in Ndióxi ña ndaa janda quivi víti. Tóco ndihi na cándéé ini Jesús cúú ná na ndaa nu Ndióxi jáchi najándoo Jesús cuachi na. Ta xihín ña yóho náha ña cúú á Ndióxi ndaa.

²⁷ Ndá sahá cája cáhnu í mí, vaha. Ama ná cuu caja cáhnu í mí sahá ña nacaja í. Jáchi a cuú nduu ndaa yó nu Ndióxi sahá ña nasacu vaha í ley Moisés. Cúú á sahá ña cándéé iní Jesús.

²⁸ Sahá ña cán quéa sa xini yó viti ña nduu ndaa yó nu Ndióxi tá ná cándéé iní Jesús cuití va. Ta có cúú á sahá ña nasacu vaha í ña sáhdá ley Moisés.

²⁹ Á cája Ndióxi ña yóho sahá na naquixi chichi Israel cuití va, vaha. Uhun. Jáchi jácacu Ndióxi na naquixi chichi Israel xihín na cóo naquixi chichi Israel.

³⁰ Jáchi iin in talaá Ndióxi ta mé Ndióxi yóho jácacu a ñayivi tá ná cándéé ini na mé á vatí cúú ná na Israel á có cúú toho ná.

³¹ Á cacu xoo í ley Moisés, da já. Uhun. Vatí cándéé iní Jesús joo a cuú cacu xoo í ley Moisés jáchi náha ña cúú á ña ndaa ta ndiyahvi a nu yo.

4

Ña nacaja Abraham sanahá ndivaha

¹ Ta ndá saha nacachi Ndióxi sahá Abraham, tásáhnu jícó yo ña nanduu da ta ndaa nu mé á.

² Có cúú á sahá ña nacaja da ña nanduu da ta ndaa nu Ndióxi já ná a cája cáhnu da mé dá. Ta cóo toho náha ña cuu caja cáhnu da mé dá saha.

³ Jáchí já cáhí tuhun Ndióxi: “Nacandéé ini Abraham Ndióxi sahá ña cán quea nanduu ndaa da nu mé á”, cáhí tuhun Ndióxi.

⁴ Ta viti ná caja í cuéntá cája chúun in dataa. Ta tá nandihí cháhvi na nu dá ta mé jihún cán co cúú á ña jásá na nu dá. Cháhvi na nu dá jáchí cáni a nu dá quehe da ña sahá chuun nacaja da.

⁵ Jáchí a cúu ndaja ndaa ñayivi mé ná nu Ndióxi sahá ña cája na. Tá ná candéé ini ñayivi Jesús, mé a nachahvi sahá cuachí anda jáví ndaja Ndióxi na ñayivi ndaa nu mé á.

⁶ Ta quiahva já nacahan rey David sahá ña yóho tá nacachi da ña tahví nahá nacuu da ndája ndaa Ndióxi vatí coo nacaja da ñaha ña ná cuu ndaja ndaa da mé dá nu Ndióxi.

⁷ Já nacachi David já:

Tahví nahá nacuu ñayivi tá nacaja cáhnu ini Ndióxi sahá ña núu nacaja na ta tá najándoo a cuachi na.

⁸ Ta tahví nahá nacuu ñayivi tá coo naquehe Ndióxi cuéntá sahá cuachi nacaja na, nacachi David sanahá ndivaha.

⁹ Á tahví nahá nacuu na nachicaan marca yiquí cuñu cuití va. Uhun. Jáchí ndúu ndaa ñayivi nu Ndióxi sahá ña cándéé ini na mé á ta co cúú á sahá ña nachicaan na marca yiquí cuñu á coo a. Ta sa xini yó ña nacachi Ndióxi ña nanduu Abraham taa ndaa nu mé á sahá ña nacandéé ini da mé á.

¹⁰ Á nacachi Ndióxi ña cúú Abraham taa ndaa nu mé á tá cámaní chicaan da marca yiquí cuñu da á tá nandihí nachicaan da marca yiquí cuñu da. Nacachi a já xihin dá tá cámaní chicaan dá marca yiquí cuñu da.

11 Jihna ñúhú ñacandeeé ini Abraham Ndióxi anda jáví ñacachi a ña cúú Abraham ñaa ndaa nu á. Tá ñandihi já ñachicaan da in marca yiquí cuñu da já náha ña mé a ndaa ñandu da ñaa ndaa nu Ndióxi jáchi ñacandeeé ini da mé á. Xihín ña yóho ñaxinu Abraham ñandu da tátuhun tátá tóco ndihi ñayivi, ña candeeé ini Ndióxi vatí coó ñachicaan ña marca yiquí cuñu na. Ta vatí coó ñachicaan ña mé marca yóho yiquí cuñu na joo cúú ná ñayivi ndaa nu Ndióxi.

12 Ta quiahva já ñandu Abraham tátá ña in mé marca yiquí cuñu. Ta a juú sahá mé marca yóho cuití va jáchi ñandu da tátá ña sahá ña candeeé cáhnu ini na Ndióxi tá quiahva ñacandeeé ini Abraham mé á tá cámaní chicaan da marca yiquí cuñu da.

Jáxinu coo Ndióxi tuhun sahan nu yo tá ná candeeé ini mé á

13 Sañahá ndivaha ñasahan Ndióxi tuhun a nu Abraham xihín nuú ña ñaquixi chichi da. ñacachi Ndióxi ña tandaa quivi ñehe táhvi ná ña ná nduu ñuyivi ñaha mé ná. Coó ñasahan Ndióxi tuhun a nu Abraham sahá ña ñacaja da ña sáhdá ley Moisés. ñasahan mé á tuhun a nu dá sahá ña ñacandeeé ini da mé á ta já ñandu ndaa da nu Ndióxi.

14 Joo tá mé a ndaa ña ñasacu vaha ley cúú ña ñehe táhvi cuhun indivi já quéa coó chuun candeeé ini Ndióxi, dá já. Jáchi xihín ña yóho jándacoo núu í tuhun ñasahan Ndióxi nu yo ña caja mé á xoho.

15 Ndítahan nu Ndióxi jándoho a ini ñayivi tá coo cája na ña sáhdá ley Moisés. Joo tá coo toho mé ley já quéa coo toho cuachi ñayivi nu ley.

16 Naṣahan Ndióxi tuhun a nu Abraham sahá ña naṇandeeé ini da mé á. Ta sahan mé á tuhun a nu yo tá cāndeé ini mé á. Coó a cája toho a á cája í ña sahdá ley Moisés á co cája toho í ña jáchi mé a ndaa ndiquehé ña vaḥa sahan Ndióxi nu yo tá cāndeé ini mé á tátuhun naṇandeeé ini Abraham mé á. Ta cúu á tátuhun naṇduu Abraham tátá tóco ndihi na cāndeé ini Ndióxi.

17 Já cáchi Ndióxi já xihín Abraham: “Naṇaja i ña ná nduu mún tátá ñayivi ndúu cuahá nación”, já cáchi tuhun Ndióxi sanahá. Mé Abraham cúu dá tátuhun tátá ndihí nu Ndióxi. Naṇandeeé ini da Ndióxi, mé á cuu jánditacu tucu ndji ta xihín tuhun cáhan mé á cája ña ná coo ña coó naṣahjin jihna.

18 Vatí coó naṣinu nuú tuhun naṣahan Ndióxi nu Abraham joo naṇandeeé tá naṇandeeé ini da Ndióxi ta naṣandati da jáxinu coo mé á tuhun a. Já naṇduu da chichi nuú naṇquixi cuahá ñayivi, na ndúu cuahá nación. Já naṣaha jáchi já naṇachi Ndióxi xihin dá sanahá: “Ndicuahá ndivaḥa ñayivi quixi chichún”, naṇachi Ndióxi xihin dá.

19 Ta naṇandeeé ini Abraham Ndióxi ña cacu jahyi da vatí sa naṇayati quivi xinu da in ciento cuia ta vatí sa cándaá cáxi ini da ña jalóho cuití va quivi catacu da ñuyívi yóho xihin Sara, ñajihí da. Ta sa cándaá ini da ña a cuú ga cacu jahyi ná joo naṇandeeé ini da Ndióxi.

20 Ta coó naṇavitá ini da ta coó naṇdicani ivi johu ini da sahá tuhun naṣahan Ndióxi nu dá. Joo naṇduu ndeeé chága ví ini da já ná cāndeé cáhnu chága ví ini da Ndióxi ta naṇaja cáhnu da mé á.

21 Já naṣinu ini da ña mé a ndaa táhyí in ndeeé Ndióxi ná jáxinu a tuhun sahan nuú ñayivi.

22 Naçandeeé ini Abraham Ndióxi sahá ña cán quéa naçachi a ña nanduu da òa ndaa nu mé á.

23 Ta tá cáchi tuhun Ndióxi ña nanduu Abraham òa ndaa nu Ndióxi sahá ña naçandeeé ini da mé á já quéa coo naçahi ña yóho sahá Abraham cuití va.

24 Naçahi ri a saha mí jáchi tá ná candeé ini Ndióxi, mé á najánditacu Jesús, xitoho í tañu ndii já quéa ndiquehe Ndióxi mí ta ndaja mé á mí ña ná nduú ñayivi ndaa nu mé á.

25 Ta nandiquiahva na Jesús ña ná quivi a ndica crúxu sahá cuachi. Ta tá nandihí nanditacu tucu a ña ná nduú ñayivi ndaa nu mé á.

5

Naçaja Ndióxi ña ná nduu ndaa yó nu mé á

1 Sahá ña cán quéa coo ga cuachi jata yo jáchi naçandeeé ini Ndióxi ta nandique táhan máni yó xihin á sahá ña naçaja Jesucristo, xitoho í.

2 Ta sahá ña candeé ini Jesucristo sahá ña cán quéa cája Ndióxi cuahá ñamaní xoho. Candeé ini mé á ta cáji ini ndátí cahun í coo í xihin mé á.

3 Ta quiahva já cáji ini tá ná quixi tondóho nu yo jáchi sa xini yo ña ndindacú chaga ini cuénta Ndióxi tá ndóho í tondóho.

4 Tá sa nandindacú ini cuénta Ndióxi naçaja tondóho anda jávi táhan ini Ndióxi xihin yo jáchi naxito ndojó mé á mí ta nandindacú chaga ini cuénta mé á. Tá ñatahan ini Ndióxi xihin yo anda jávi candaa vaha ini ña jáxinu coo mé á tuhun nasahan a nu yo.

5 Tá ndátí ña nasahan Ndióxi tuhun a quiahva nu yo já a cándo nuu toho Ndióxi xihin yo jáchi najándicutú Ndióxi ínima yo xihin ña quihvi ini a

mí. Nacaja Ndióxi ña yóho xihin ínimá yii mé á ña nasahan nu yo.

⁶ Sahá ña co ndée yo jácácu mí sahá ña cán quéa naxihí Jesucristo saha yo ta coó nacayáncá a quivi a ta ni coó naxihí yachi a. Naxihí a mé quivi nanditahan quivi a sahá cuachi ñayivi quini.

⁷ Ihvi ndivaha cáa já queta in ñayivi quivi na sahá inga ñayivi vatí cúú ná na vaha. Joo mé a ndaa cuu queta in ñayivi coo tiahva na quivi na sahá in na cúú na vaha ndivaha.

⁸ Náha Ndióxi nu yo ña mé a ndaa táhyí quíhvi ini a mí jáchi vatí cúú yó ñayivi cája cuachi joo naxihí tá naxihí Jesucristo saha yo.

⁹ Ta viti sa nanduú ñayivi ndaa nu mé á sahá nii Jesucristo, dó naxita saha yo. Ta sa saha mé á cacu ndaa ínimá yo já ná a cójo ini Ndióxi sahá cuachí.

¹⁰ Nasacuú na coó naxini táhan vaha xihin Ndióxi joo sahá ña naxihí in túhún jini já jahyi mé á sahá ña cán quéa nandique táhan máni yó xihin á viti. Xihín ña yóho cuu cacu ndaa ínimá yo jáchi nanditacu tucu Jesucristo ta sa nandique táhan máni yó xihin Ndióxi viti.

¹¹ Ta a juú ña yóho cuití va vaha jáchi cájii ndivaha ini xihin Ndióxi sahá ña nacaja Jesucristo, xitoho í. Sahá ña cán quéa naxinu yó nandique táhan máni yó xihin Ndióxi.

Ña nacaja Adán xihín ña nacaja Jesucristo

¹² Ta sahá cuachi nacaja in taa naní Adán sahá ña cán quéa nandihvi cuachi ñuyiví yóho ta tá nandihvi cuachi ñuyiví já nacasáhá xihí ñayivi. Tóco ndihí cája í cuachi ta sahá ña yóho ndítahan quivi ndihí.

13 Tá cámanj quiahva Ndióxi ley mé á nu Moisés nasacomí tóco ndihi ñayivi cuachi. Joo co quéhe Ndióxi cuéntá sahá cuachi jáchi coó toho ley nasahjin tiempo já.

14 Janda tiempo nasahjin Adán nasasáhá xihj ñayivi sahá cuachi na ta janda naxinu tiempo nasahjin Moisés naxihj na vatí coó najaja na mé cuachi najaja Adán. Nasacomí Adán cuachi jáchi naquehe núu da ña najachi Ndióxi xihin dá. Ta mé Adán yóho nasacuu da tátuhun yuhú núu da quixi tá nu ndihí.

15 Joo a cuú jándique táhan í cuachi najaja Adán xihin tóco ndihi ña vaha sahan Ndióxi nu yo. Jáchi sahá cuachi najaja in túhún ña, xihj cuahá ndivaha ñayivi. Joo ñamanj najaja Ndióxi xoho sahá ña najaja in túhún ña naní Jesucristo cúu á in ñamanj cáhnu ndivaha ña ñéhe táhvj cuahá ndivaha ñayivi.

16 A cuú jácatáhan í cuachi najaja in dataa xihin ñamanj cája Ndióxi xoho jáchi saha in túhún cuachi naxinu cháhan jatá ñayivi ta já nasasáhá xihj na. Vatí nandicuahá cuachi ñayivi joo najaja Ndióxi ñamanj xihin ná já nandaja ndaa mé á na ta najachi a ña coó ga cuachi na nu mé á.

17 Sahá cuachi najaja in túhún ña naní Adán nasasáhá xihj ñayivi. Joo sahá ña najaja in túhún ña naní Jesucristo ñéhe táhvj yó ndoo manj uun cuachí nu Ndióxi. Jáchi cáhnu ndivaha ñamanj cája Ndióxi xoho ña cán quéa ñéhe ndeé chága íní yo caca í ichj cuéntá Ndióxi sahá ña najaja Jesucristo.

18 Sahá cuachi najaja Adán najachi Ndióxi ña cómi tóco ndihi ñayivi cuachi nu á. Joo sahá ña ndaa najaja Jesucristo najachi Ndióxi ña ndá

ñayivi ñacuu cuu nduu ndaa ña nu mé á jáchi co cómí ga ña cuachi nu á.

¹⁹ Sáa ñasahjin ini Adán jáchi cóo ñaxeén da caja da ña cúni Ndióxi. Ta sahá ña ñacaja Adán cuahá ndivaha ñayivi ñanduu na ñayivi cuachi. Joo ñacaja Jesucristo tóco ndihi ña cúni Ndióxi ta xihín ña ñacaja in túhún taa Jesucristo ñanduu ndaa cuahá ndivaha ñayivi nu Ndióxi.

²⁰ Tá ñasahan Ndióxi ley nu Moisés já ñacandaa ini ñayivi ña cuaha chága cúu cuachi na. Joo tá ñandicuahá cuachi ñayivi já ñatahvi chága ini Ndióxi saha ná.

²¹ Ñandihvi cuachi ñuyiví ta ñasacomí a cuénta sahá ñayivi. Ta sahá ña ñacaja na cuachi sahá ña cán quéa ñacasahá xihí na. Joo ñacaja Ndióxi cuahá ñamani xihin yo ta ñasacomí a cuénta saha yo já ná cuu nduu ñayivi ndaa nu mé á ta já ná cuu cacu ndaa ínima yo anda ama cáa quivi sahá ña ñacaja Jesucristo, xitoho í.

6

Ñaxihí yó nuú cuachi joo tácu yo xoo Jesucristo

¹ Ama ná cachi xihin táhan í: “Cóho caja tá caja í cuachi já ná coo cáhnu chága ini Ndióxi saha yo.”

² Ama ná cachi rí já jáchi cúu yo tátuhun ña sa ñaxihí nuú cuachi ta tá sa ñaxihí yó nuú cuachi ama ná cacomí ga cuachi cuénta saha yo.

³ Tá ñacandúta yo cuénta Jesucristo cúu á tátuhun in yó ñaxihí xihín Jesucristo.

⁴ Jáchi tá ñacandúta yo já cúu á tátuhun in yó ñanduxu xihín Jesucristo ta ñaxihí yó nuú cuachi. Ta tá najánditacu Ndióxi Jesucristo já cúu á tátuhun

in yó nanditacu xih̄in mé á. Jáchi xih̄in ndée cáhnu Ndióxi, tátá yó nanditacu Jesucristo ta sa xih̄in mé ndée cán cuu caca í ichí saá viti.

⁵ Tá quiahva in nanduú xih̄in Jesucristo tá naxih̄i a quiahva já in nanduú xih̄in á tá nanditacu a.

⁶ Tá cámani cándéé iní Jesús já nacatóo ndivaha í cája í cuachi jáchi nasahnda cuachi chuun nu yó. Joo sahá ña naxih̄i Jesucristo ndica crúxu sahá ña cán quéa najándacoo í cuachi cája í ta viti cō sáhndá ga cuachi chuun nu yó.

⁷ Jáchi tá sa naxih̄i in dataa cō sáhndá ga cuachi chuun nu dá ña cán quéa cúú á tátuhun sa naxih̄i yó xih̄in Jesucristo sahá ña cán quéa cō sáhndá ga cuachi chuun nu yó viti.

⁸ Ta cúú á tátuhun naxih̄i yó tá naxih̄i Jesucristo ña cán quéa xini vaha í ña cūhun yó coo í nu ín mé á anda ama cáa quivi.

⁹ Sa xini yó ña nanditacu tucu Jesucristo ta a ndícō cō ga quivi a jáchi ni in ñaha a cuú caja ña ná quivi tucu a.

¹⁰ In tálaá tañu naxih̄i a sahá cuachí ta viti xih̄in chí nuu cō ndítahan ga nu á quivi a sahá cuachí. Ta viti tácu Jesucristo cuéntá Ndióxi.

¹¹ Ña cán quéa ndítahan catacu ndó ñuyívi yóho tátuhun na sa naxih̄i nuú cuachi já ná a cáhndá ga cuachi chuun nu ndó. Ndítahan catacu ndó cuéntá Ndióxi ña in ná nduu ndó xih̄in Jesucristo.

¹² Ña cán quéa a quiahva ndó ñamani nuú cuachi ña ná cacomí a cuéntá sahá yiquí cuñu ndó jáchi tá ná ndiquiahva ndó mé ndó ndahá cuachi já quéa caja ndó cuachi ña xica ini ndó caja ndó.

13 A ndíquiahva ga ndó yiquí cuñu ndó ndáha cuachi ná a cája ndó ña núu. Joo vaha chága ná ndiquiahva ndó yiquí cuñu ndó ndáha Ndióxi. Nasacuu ndó tátuhun in ndii nu Ndióxi jáchi nacaja ndó cuachi joo viti cúu ndó tátuhun ñayivi, na nanditacu tucu nacaja Ndióxi. Ndítahan ndiquahva ndó mé ndó ndáha Ndióxi ña ná caja ndó ña vaha.

14 Co cómi ga cuachi cuénta saha ndó viti jáchi tácu ndo saha ñamani cája Ndióxi ta co tácu ndo saha ña sácú vaha ndó ley Moisés.

Ndítahan nu yo ndicaxi ndá ichi candico yo

15 Ama ná caja rí cuachi saha ña co cómi ga ley Moisés cuénta saha yo. Uhun. A cája toho í ña jáchi xihín ñamani cája Ndióxi xihín yo cánda iní ña cómi mé á cuénta saha yo.

16 Sa xini ndó ña ndíquiahva in mozo mé dá ndáha xitoho da ta cája da ndá chuun nacuu ña sahan xitoho da nu dá caja da. Ta viti cuu ndicaxi ndó ndá na cacuu xitoho ndó. Tá ná ndicaxi ndó caja ndó cuachi já quéa cacuu ndó mozo ña quini ta cuhun ndó indayá. Ta tá ná ndicaxi ndó caja ndó ña cuni Ndióxi já quéa cacuu ndó cuénta mé á ta caja mé á ña ná nduu ndaa ndó nu á viti.

17 Jihna nacaja ndó cuachi cuití va joo ndixahvi Ndióxi jáchi xihín ndinuhu ini ndó cája ndó ña ndaa, ña nacatiahva ndó cuénta Ndióxi.

18 Nandoo cuachi ndó ta co cúu ga ndó mozo cuénta cuachi viti. Nanduu ndó mozo cuénta Ndióxi ta cája ndó ña ndaa viti.

19 Najána ha i saha in mozo nu ndó já ná cánda vaha chága ini ndó ña ndaa. Mé ndó nasacuu ndó

tátuhun mozo jáchi jihna nandiquiahva ndó mé ndó ndahá cuachi ta mí cuachi nasacuu a tátuhun xitoho ndó. Nacaja ndó tá nuú ña núu, ña nacahvi ini ndó caja ndó. Joo viti nandiquiahva ndó mé ndó ndahá Ndióxi ta nasacu ini ndó caja ndó ña ndaa xihín ndinuhu ini ndó jáchi já cáni a nu ndó caja ndó ña ná cacuu ndó ñayivi yii nu mé á.

²⁰ Tá nasacuu ndó mozo cuachi coó naxeén ndó caja ndó ña ndaa ña cúni Ndióxi.

²¹ Ni in ña vaha coó nañehe ndó saha cuachi nacaja ndó. Ta viti cácahan nuu ndo saha mé cuachi nacaja ndó. Ta ndá ñayivi sá cája cuachi cuhun na coo na indayá anda ama cáa quivi.

²² Joo co cómi ga cuachi cuénta saha ndo viti jáchi nanduu Ndióxi xitoho ndó. Vaha quehe ndó tá ná caja ndó ña cúni mé á jáchi já xinu coo ndó cacuu ndó ñayivi yii nu Ndióxi ta já cuhun ndó coo ndó xihin mé á anda ama cáa quivi.

²³ Jáchi tá cája í cuachi cúu á tátuhun ndíyíca yo nu Ndióxi sahá ña nacaja í ta ini indayá चाहví sahá. Joo ñamaní cája Ndióxi xoho sahá ña naxihi Jesucristo, xitoho í cúu á ña cohó catacú indivi xihin mé á anda ama cáa quivi.

7

Có cómi ga ley cuénta saha yo

¹ Candehé ndo ñani mí i, na cúu cuénta Jesús. Sa xini vaha ndó ley Moisés ta sa xini ndó ña cómi ley cuénta sahá ñayivi nani tácu cuití va na.

² Cúu á tátuhun tá natandaha in ñañáha xihin in dataa já quea cáchi ley cúu ña ñájíhi da anda ná xinu coo quivi quivi da. Joo cáchi mé ley ña tá sa naxihi da coo cúu ga ña ñájíhi da.

³ Sahá ña cán quéa cuu tandaha tucu ña xihín inga taa jáchi co sáhdá ga mé ley chuun nu ña. Ta co caja ña cuachi nu Ndióxi tá ná tandaha tucu ña jáchi sa naxihi va yí ña. Joo tá ná tandaha tucu ña nani tácu yí ña já quéa caja ña cuachi nu Ndióxi.

⁴ Ta quiahva já ndóho ri ndóhó va ñani mí i, na cúu cuénta Jesús. Cúu á tátuhun naxihi ndó nu ley Moisés ña cán quéa co cómi ga mé ley cuénta saha ndo. Ta viti núná nuú Jesucristo cacomí a cuénta saha ndo ña ná cacuu ndó cuénta mé a nanditacu tucu. Ta viti cuu caja í ña vaha, ña cúní Ndióxi.

⁵ Tá cámani candeé iní Jesucristo nacaja í ndinuhu ña núu ña nasacahvi iní caja í. Vatí sa xini yó ña cáchi mé ley joo nacaja chaga yó cuachi ña nacahvi iní caja í. Ña cán quéa nanditahan nu yó quiví ná cuhun í ndoho iní indayá, nduu.

⁶ Joo nacaja Ndióxi ña ná jani yó nuú ña sáhdá ley Moisés ña nasacomí cuénta saha yo. Ta viti núná nu yó caja í ña cúní mé á jáchi nandijama ínimá yí Ndióxi mí sahá ña cán quéa co cómi ga ley, ña nacahyí na jihna cuénta saha yo viti.

Caja tá caja í cuachi vatí candeé iní Jesucristo

⁷ Á cúní cachi ña yóho ña a váha toho ley Moisés. Uhun. Ña vaha cúu á jáchi xihín ña cáhan mé ley cándaá vaha iní ndá a cúu cuachi. Já cáchi mé ley já: “A ndiáva toho iní ndó cacomí ndó ñaha cómi inga na”, cáchi a. Ña cán quéa cándaá iní viti ña a váha toho tá ná caja í já.

⁸ Tá ná a cóo toho ley, nduu já quéa a cándaá iní i ña cúu cuachi. Ta coó toho cuachi caja i tá coó ley, nduu. Joo viti cándaá iní i ña a váha toho ndiáva iní i cacomí i ñaha ñani táhan i jáchi cáchi ley a caja i

ñá. Ñá cán quéa nandihvi cuachi ini i ta nacasáhá cáhvi ini i ndaja caja i cacomí i ñaha inga na.

9 Tá cámaní candaa ini i ña cáchí ley Moisés já nacahán i cúú u da vaha. Joo tá natandaa quivi natacu ini i xihín ña cáchí ley Moisés anda jáví nacandaa ini i ña ñúhu cuachi ini i ta nacandaa ini i ña cúú u da cája cuachi ta ndítahan nuú i cuhun i indayá sahá.

10 Tá ná cuu caja ñayivi tóco ndihi ña cáchí ley Moisés já cuhun na coo na nu ín Ndióxi anda ama cáa quivi. Joo coo nacuu caja i ña cáchí mé ley sahá ña cán quéa nditahan nuú i cuhun i indayá sahá.

11 Najándahvi cuachi yehe jáchi nacahán i cuu cuhun i indivi sahá ña cája i ña cáchí ley joo sahá ña coo nacuu xinu coo i caja i ña sahá ña cán quéa cuhun i indayá.

12 Ta yii ndivaha cúú ley Moisés. Ta yii ndivaha cúú tuhun nasahnda Ndióxi caja í. Ta cúú á ña ndaa ta cúú á ña vaha.

13 Ama ná jáqueta nuu ley yehe ini indayá nani cúú á ña vaha. Uhun. A cúú cuití caja ley jáqueta nuu a yehe ini indayá. Cuachi quéa ndúcú chindahá yehe cuhun i indayá. Nañehe íni cuachi cañehe a yehe cuhun i indayá saha ley. Xihín ña yóho cándaa ini i ña quini ndivaha cúú cuachi ta vaha ndivaha cúú mé ley.

14 Sa xini yo ña cúú ley cuéntá Ndióxi joo yehe cúú u in da cája cuachi ta cája i ña núu jáchi mé cuachi cómi a cuéntá sahá i.

15 Co cándaa ini i ña cája i jáchi cúni caja i ña vaha joo co cája i ña. Ña cája i quéa mé ñaha ña cándají i.

16 Tá cája i cuachi ña co cúni caja i já cándaä ini i ña vaha cúu ley.

17 Mé a ndaa co cúni caja i cuachi joo cuachi ndácaan ini i cúu á ña jácahan yehé cája i ña.

18 Sa xini ña co ndeé yiquí cuñu i caja ña vaha jáchi coó ña vaha ndácaan ini i. Vatí cúni caja i ña vaha joo co sahan mé á caja i ña.

19 Cúni caja i ña vaha joo co cája toho i ña. Ña cája i cúu á ña núu ña co cúni caja i.

20 Caja i ña co cúni caja i já cándaä ini i ña cuachi ndácaan ini i quéa chindahá nihni a yehé cája i ña núu.

21 Cándehé ndo ña yóho: Vatí cúni caja i ña vaha joo cája i ña núu jáchi ña cán cuití va xinu íni i caja i.

22 Janda ínima i xinu coo ña cátoó i caja i ña cáhan ley Ndióxi.

23 Joo ndácaan inga ñaha ini i ta cáni táhan mé ñaha cán xihin xini tóni i. Ta mé ñaha ndácaan ini i cúu á cuachi. Ta cándeé cuachi xihin i já sáhdá a chuun nuú i.

24 Ndáhvi nahá nacuu u. Yo cuu jácaçu yehé ná a cája ga i cuachi ña cañehe yehé cuhun i indayá.

25 Ndíquiahva i ndixahvi nu Ndióxi jáchi xihin ña nacaja Jesucristo, xitoho í cuu jácaçu Ndióxi yehé já ná a cája ga i cuachi. Ña cán quéa cándaä ini i ña ndítahan cája i ña sáhdá ley Ndióxi joo cuachi ndácaan ini i sáhdá chuun nuú i.

8

Ndíco í in íchi nu cája í ña cúni ínima yii Ndióxi

1 Ta sahá ña in nanduú xihin Jesucristo sahá ña cán quéa a chínúu Ndióxi cuachi jata yo viti. Jáchi

cō cája gā í ña xíca ini yiquí cuñu í. Ña cája í cúu ña cúnj ínimā yij Ndióxi.

² Jáchj xihín ña ñajaja Jesucristo najáca cu ínimā yij Ndióxi mí ta ñasahnu a cuachí já ná a cūhun yó indayá.

³ Coó ñacuu caja í tóco ndihi ña sáhdá ley Moisés ña cán quéa coó ñacuu nduu ndaa yó nu Ndióxi xihín mé ley. Ña cán quéa ñajaja Ndióxi inga ñaha tá nachindahá mé á Jesucristo, jahyi a. Nanduu Jesucristo in ñayivi ta tá quiahva cácu ñayivi quiahva já ñacacu Jesucristo ñuyíví. Ta tá ñaxihí mé á ndica crúxu já nachahvi a saha tóco ndihi cuachí sahá ña cán quéa cō sáhdá gā cuachi chuun nu yo.

⁴ Ta ñajaja Ndióxi ña yóho já ná cuu xinu coo í caja í ña sáhdá ley mé á tá ndaca ínimā yij Ndióxi mí. Jín va caja í viti jáchj cō ndúu gā yó ndahá cuachi.

⁵ Ñayivi, ña cája ña xíca ini yiquí cuñu, ña cán cúu ña ndicani cuahá ini sahá yiquí cuñu. Joo ña cája ña cúnj ínimā yij Ndióxi ña cán cúu ná ndúcú jácavatá ña Ndióxi.

⁶ Tá ná ndicani cuahá ini na sahá ña cúnj yiquí cuñu na já quéa cūhun ña indayá. Joo tá ná ndicani ini na sahá ña cúnj ínimā yij Ndióxi já quéa coo vaha ini na ta ñehē táhvi ná cūhun ña indiví.

⁷ Joo ñayivi ndicani ini saha yiquí cuñu, ña cán cúu ná ña ihvi Ndióxi jáchj cō cúnj ña caja na ña cáchj ley Ndióxi ta ni a cuú caja na ña.

⁸ Sahá ña cán quéa tá cómí cuachi cuéntá saha ná já quéa a cuú caja na ña cájij ini Ndióxi xihín.

⁹ Ta tá mé a ndaa ndacaan ínimā yij Ndióxi ini

ndó já quéa cō ndíco ga ndó íchi cuéntá ña núu, ña nasacaja ndó jihna. Ta viti ndíco ndó íchi vaha ta cãja ndó ña cūni Ndióxi. Jáchi ndá na cō ndácaan ínima Jesucristo ini, na cán cō cúú ná cuéntá mé á.

10 Tá ndácaan Jesucristo ini ínima ndo vaxi quivi quivi yiquí cuñu ndó sahá cuachi nacaja ndó. Joo mé a ndaa catacu ínima ndo nu ín Ndióxi anda ama cãa quivi jáchi nanduu ndaa ndó nu Ndióxi nacaja mé á.

11 Nacaja ínima yii Ndióxi ña ná nditacu tucu Jesucristo ta tá ndácaan ínima yii Ndióxi ini ínima ndo já tandaa quivi caja mé á ña ná nditacu tucu yiquí cuñu ndó saha mé ínima yii Ndióxi ndícaan ini ndó.

12 Candehé ndó ñani mí i, na cúú cuéntá Jesús. Cō ndítahan nu ndó caja ndó ña núu, ña xíca ini ndó caja ndó.

13 Jáchi tá ndinuhu ini ndó caja ndó ña núu, ña xíca ini ndó já quéa ndítahan nu ndó cūhun ndó indayá. Joo tá xihín ndée ínima yii Ndióxi jándihi ndó sahá ña núu xíca ini ndó caja ndó já quéa vaxi quivi cūhun ndó coo ndó xihín mé á anda ama cãa quivi.

14 Ndá na nandiquiahva mé ndáha ínima yii Ndióxi ña ná candaca a na, mé a ndaa táhyí cúú ná jahyi Ndióxi.

15 Nasahan Ndióxi ínima yii mé á nu ndo joo cōo nasahan ña nu ndo ña ná catavi nihni a ndohó ta já quixi ña jáyihví a ndohó. Nasahan Ndióxi ínima yii mé á nu ndo jáchi xihín ña yóho ndája Ndióxi ndohó jahyi mé á ta saha mé ínima yii yóho cáhan yó xihín Ndióxi ta cáchí yo: “Tátá maní i.”

16 Ta cáchí ínimā yīi Ndióxi xihin ínimā yo ña mé a ndaa cúu yó jahyi Ndióxi.

17 Ta sahá ña cúu yó jahyi mé á sahá ña cán quéa ñehe táhvi mí ví ndiquehé ña nacachi Ndióxi quiahva nu yo. Ta sa mé ña ñehe táhvi yo yóho tahnda java ña xihin Jesucristo. Tá ta mé a ndaa táhyi ndoho iní xihin á já quéa tá nandihí cohó coo í xihin mé á indiví ta cán ndicáhnu í xihin á.

18 Coó a caja toho a tá ná ndoho ini í ñuyiví yóho jáchi vaxi quiví ndicáhnu ndivaha í xihin Jesucristo caja Ndióxi.

19 Tóco ndihí ña nacavaha mé á ndátí ndihí a ta ndiáva iní a ña ná tandaa quí quiví cachi Ndióxi ndá ñayivi cúu cuéntá mé á.

20 Nacaja Ndióxi ña ná ndoho ini tóco ndihí ña nacavaha mé á. Mé ñaha nacavaha Ndióxi co cúní a ndoho ini a joo sácú ini Ndióxi ña ná ndoho ini tóco ndihí ña nacavaha mé á. Ta ndátí tiahva ndihí ñaha

21 anda tandaa quiví caja Ndióxi ña janí ña já ná a cácomí ga cuachi cuéntá sahá já ná a tíví ga ña. Ta ñúchí ndivaha mé quiví já tá cajii ini tóco ndihí ñaha nacavaha Ndióxi xihin tóco ndihí na cúu jahyi mé á. Jáchi a cácomí ga cuachi cuéntá saha ná.

22 Sa xini yo ña janda sanahá ndivaha ta anda viti tána ndivaha tóco ndihí ña nacavaha Ndióxi ta ndóho ndivaha ini a tátuhun ndóho ini in ñáñáha tá ndúcú ndée ña cacu jahyi ñá.

23 Ta quiahva já ndóho ri ini mí ví. Ínimā yīi Ndióxi cúu ña sahan tiahva mé á nu yo já ná candaa iní ndá quiahva in ña quiahva mé á nu yo chága chí nuu. Ta tána ndivaha í anda quiahva ná yaha

ñ_a ndóho iní. Ta ndátí tandaa quiví ndaja Ndióxi tóco ndihi mí ná nduú jahyi mé á já ná ndiquehé yiquí cuñu saá.

²⁴ Najácaacu Ndióxi mí jáchi nacandeé iní mé á vatí coó naxiní ñ_a nacachi mé á quiahva nu yo. Tá xíní cáxí yo in ñaha já cánda_a iní ñ_a co xíní ñúhú toho candatí quehé ñ_a jáchi co xíní ñúhú candatí ñaha cómi yo.

²⁵ Joo tá ná candatí in ñaha ñ_a co xíní yo já queá co ndíhi iní nani ndátí ñ_a.

²⁶ Tá cávitá iní já chindeé ínima yii Ndióxi mí jáchi co tiáhva í ndaja caça tahví yo nu Ndióxi tá quiahva ndítahan caça tahví yó nu á. Joo sa mé ínima yii Ndióxi yóho tána ta cáhan xihín tuhun ñ_a a cúu cahan yo. Já caja mé á tá xíca tahví a nu Ndióxi saha yo.

²⁷ Ta sa xíní Ndióxi ñ_a cáhvi iní ta sa xíní a ñ_a xíca tahví ínima yii mé á saha yo. Ñ_a cúni Ndióxi caja saha yo ñ_a jan queá xíca tahví ínima yii mé á saha yo, na cúu ñayivi cuéntá mé á.

Ni in ñaha a cúu cahnu a mí tá cándéé iní Jesucristo

²⁸ Ta sa xíní yo ñ_a tóco ndihi ñ_a ndóho í ndaja Ndióxi ñ_a ná nduu a ñ_a vaha tá quíhvi iní mé á. Jáchi mí cúu yó na sa nasacu ini Ndióxi ñ_a ná caja í ñ_a cúni mé á.

²⁹ Ndá ñayivi nacaxi Ndióxi anda saha nacaxi a na ñ_a ná nduu na tátuhun Jesucristo, mé á cúu jahyi Ndióxi. Jáchi cúni Ndióxi ñ_a ná nduu Jesucristo jiní nuú ndihi na cúu cuéntá mé á.

³⁰ Ta nacana Ndióxi na nacaxi a ñ_a ná candeé ini na mé á. Ta nacaja mé á ñ_a ná nduu ndaa na nu

á. Ta vaxi quivi caja mé á ña ná ndinánu ndihi na cán xihín á.

³¹ Ndiá cachí sahá ña yóho. Ni in túhún ñaha a cúu cani táhan xoho ta ni a cúu quee vaha xoho jáchi cuahan Ndióxi xoo í.

³² Ta coó nacajíhnda Ndióxi jahyi a jáchi nandiquiahva Ndióxi Jesucristo, jahyi a ña ná quivi a saha yo. Xihín ña yóho cándaá iní ña co ndáhvi cúu ini a quiahva tóco ndihi ñaha nu yo.

³³ Yo já cuu chícáan cuachi jatá na nacaxi Ndióxi. Ni in ñayivi a cúu chícáan cuachi jatá na jáchi sa mé Ndióxi nandaja mé á na ñayivi ndaa nu á.

³⁴ Yo já cuu jácojo cuachi jatá na cúu cuénta mé á. Ni in ñayivi jáchi naxihí Jesucristo saha yo. Nandítacu tucu a ta íin coo a xoo cuáha Ndióxi indivi xíca tahvi a nu Ndióxi saha yo.

³⁵ Yo já cuu caji nuu nu Jesucristo quihvi ini a mí. Ni in ñaha a cúu caja ña jándacoo Jesucristo ña quihvi ini a mí. Vatí ná ndoho ndivaha iní ta vatí ná quixi ña yíhvi yo ta vatí ná ndicuíta na caja xíxi na xoho ta vatí ná quixi joco ta vatí janda jáhma yo ná ndimaní ta vatí tondóhó vaxi nu yo á ñayivi ndúcú cahní mí joo ni in ña yóho a cúu caji nuu a nu Jesucristo ña quihvi ini a mí.

³⁶ Já cáchí tuhun Ndióxi já:

Saha Ndióxi sácú ini ñayivi cahní na ndehe ndijáá níi quivi.

Tá quiahva cája na xihín ndicachi, rí cuhun quivi quiahva já cája na xihín nde, cáchí tuhun Ndióxi.

³⁷ Vatí ndóho í tóco ndihi ña yóho joo quee vaha tá quee vaha í caja Jesucristo jáchi quihvi ini a mí.

³⁸ Sa xíní vaha i ña ni in ñaha a cuú caja tavá mí ndáha Jesucristo, mé a quíhvi ini mí. Ta coó a caja toho a á tácu yo á sa naxihí yo. Ni táto Ndióxi ni ña sáhdá chuun nuú ñayivi ta ni ña ndóho iní viti ni ña ndoho iní chí nuu

³⁹ ta ni in ñaha ín indivi ta ni in ñaha ín tixi ñúhu ta ni in ñaha ñacavaha Ndióxi a cuú tavá mí ndáha Ndióxi, mé a quíhvi ini mí. Ta najánaha Jesucristo, xitoho í nu yo ña quíhvi ndivaha ini Ndióxi mí.

9

Ñayivi naquixi chichi Israel cúu na ñacaxi Ndióxi

¹ Ña ndaa cúu ña cáhan i xihín ndó viti ta co cávaha i ña tuhún jáchi cúu u cuénta Jesucristo. Sáhdá ínima yíi Ndióxi chuun nu xíní túní i sahá ña cán quea co cáhan i ña tuhún.

² Ín cuéha ndivaha ini i ta já táhvi ndivaha ini i sahá na Israel.

³ Mé a ndaa cúni yehe chindeé e na naquixi chichi nuú naquixi mí i ña ná candeé ini na Jesucristo. Ta jandá ín tiahva i cacuu u da chícáan na cháhan jata tá ta xihín ña yóho cuu cacu ndaa ínima ná. Joo a cuú caja i ña.

⁴ Mé na cán naquixi na chichi Israel ta ñacaxi Ndióxi na já ná nduu na ñayivi cuénta mé á. Najánaha Ndióxi nu ná nda quiahva cáhnu cúu mé á. Ta ñasahan tuhun a nu ná ña ñasacu ini a caja saha ná. Ñasahan Ndióxi ley Moisés nu ná ta najánaha mé á na ndaja ndítahan nu ná caja cáhnu na mé á. Ñacaxi tuhun a xihín ná sahá ñamaní caja mé á xihín ná chí nuu.

⁵ Ta ñayivi Israel naquixi na chichi na ñasanduu sanahá. Ta ñacacu Jesucristo chichi mé na cán ta

na₂nduu a in ñayivi. Chí anda ama cáa quivi ná caja cáhnu yó Jesucristo, mé á cúu Ndióxi, mé á cómi cuéntá saha tóco ndihi ñaha. Já ná coo.

⁶ A juú cahán ndo ña coó najáxi₁nu Ndióxi₁ tuhun a nasahan nuú na Israel. A juú ndihi ñayivi jan cúu na cuéntá Ndióxi₁ vatí naquixi na chichi Israel.

⁷ A juú tóco ndihi na naquixi chichi Abraham cúu ná cuéntá Ndióxi₁ jáchi janda saha nacachi Ndióxi₁ xihin dá: “Ñayivi cuaha quixi chichún cacuu na jahyi Isaac”, cáchi a xihin Abraham.

⁸ Ña yóho cúni cachi a ña ni in tühún ñayivi co cúu ná jahyi Ndióxi₁ sahá ña naquixi na chichi Abraham. Na cúu ndusa jahyi Ndióxi₁ cúu ná naquixi chichi Isaac jáchi cuéntá Isaac najáxi₁nu coo Ndióxi₁ tuhun nasahan nu Abraham.

⁹ Sanahá ndivaha nasahan Ndióxi₁ tuhun a nu Abraham já cáchi a já: “Xinu cuia₁ já quixi tucu u ta cacu jahyi ta ñájihún, Sara.”

¹⁰ Candehé ndo ná ndicani i nu ndo ña nayaha chaga chinuu. Isaac, da cúu tásáhnu jícó yo nasacuu da tátá ndíví ta valí jahyi Rebeca.

¹¹ Tá cámani cacu ta cuatí jahyi na já nasacu ini Ndióxi₁ caxi a in a ta cacu xóo a inga vatí a ñaha caja ndíví ta valí ni ña vaha ni ña núu. Já nasacu ini a caja

¹² ta já nacachi a xihin Rebeca: “Jahyún, da cacu chí ivi cahnda chuun nuú da cacu nu cuítí.”

¹³ Ta já cáchi tucu tuhun Ndióxi₁ já sahá jahyi Rebeca: “Nacaxi i Jacobo, da nacacu chí ivi caja i ñamani xihin dá joo nasacu xóo i Esaú, da nacacu nu cuítí.” Já nacaja Ndióxi₁ jáchi já nasacu ini a caja.

14 Ama ná cachi rí ña cō cája ndaa Ndióxi. A cáchi toho í já.

15 Já ñacachi Ndióxi xihin Moisés sanahá: “Tahvi ini i sahá ñayivi joo mí i caxi i yo tahvi ini i saha. Ta tahnda ini i sahá ñayivi, joo mí i caxi i yo tahnda ini i saha”, ñacachi Ndióxi sanahá.

16 Ña cán quéa cō cája Ndióxi ña cúni ñayivi ta a cúu caja ndúsa ñayivi xihin á ña ná tahnda ini a saha ná jáchi táhnda ini a sahá ñayivi, ña cúni mé á tahnda ini a saha.

17 Já cáchi tuhun Ndióxi já xihín da cúu rey nuú nación Egipto: “Ñandaja i yohó rey jáchi cúni jánaha i nuun ña cuu cája i tóco ndihi ñaha tá cúni já ná candaa ini tóco ndihi ñayivi ndúu ñuyiví ña cáhnu ndivaha cúu yehe”, ñacachi Ndióxi.

18 Ña cán quéa tá cúni Ndióxi tahnda ini a sahá ñayivi já cuu tahnda ini a saha ná. Ta tá cúni a ndaja táhyí a ínimá ná já cuu ndaja táhyí a ña.

19 Joo a cuú cachí ña cō cája ndaa Ndióxi tá cáchi a ña cómi yo cuachi. Vatí sácú ini Ndióxi ña caja in in ñayivi joo cō chindahá a ña caja na cuachi.

20 Cō ndítahan nuú ñayivi ndaja ndichí ña Ndióxi sahá ña cája mé á. Jáchi sa xini yo ña cō ndítahan nuú in quiji cachi a xihín da cávaha ñaha: “Cō cátóo i coo i tá quiahva ñacavaha ndó yehe.”

21 A cuú cachi quiji cán já jáchi mé da cávaha quiji cán, cávaha da ña tá quiahva cúni mé dá. Xihín in mbohla loho ñuhú quiji cuu cávaha da in quiji cacuu a javí á in quiji cuéntá yávi núhu.

22 Ta quiahva já cája Ndióxi xihín ñayivi. Ín tiahva mé á jánaha nu ná ña xójo ndivaha ini a sahá cuachi na. Ta ín tiahva mé á jánaha nu ná

ñā cuu caja mé á tóco ndihi ñaha. Joo ñacaja ndeé ini Ndióxi ta ñasandati a jándoho a ini ñayivi vatí nanditahan nu ná ndoho ini na sahá cuachi na.

²³ Mé a ndaa táhnda ini Ndióxi sahá ñayivi ta cúni a jánaḥa nu ná ñā cáhnu ndivaḥa cúú mé á ta cúni a jánaḥa nu ná ndá quiahva quíhvi ini a na. Anda sanahá ndivaḥa sácú ini a jánaḥa nu yo ndá quiahva cáhnu cacuu yó nu mé á.

²⁴ Naçaxi a ñayivi tañu na ñaquixi chichi Israel ta ñaçaxi mé á ñayivi tañu na coó ñaquixi chichi Israel. Ta mí cúú yó na ñaçaxi a.

²⁵ Já ñacachi Ndióxi já sanahá ta já ñaçahyi Oseas ini tuhun Ndióxi:

Tandaa quivi çaxi yehe ñayivi, na co cúú cuéntá mí i ta ndaja i na cuéntá mí i.

Ta na coó ñaquihvi ini i jihna quíhvi ini i na viti.

²⁶ Ta sa mé nu ndúu ñayivi, na coó ñasacuu cuéntá Ndióxi,

cán cuhun mé á çaxi a na ta caja ñā ná nduu na cuéntá mé á jáchi cúú á in Ndióxi tácu, já cáchi tuhun mé á.

²⁷ Ta sahá na ñaquixi chichi Israel já ñacachi Isaías: “Vatí ndícuahá ñayivi Israel tá quiahva cuahá ñutí yuhú tañuhú joo chá va cacuu na cacu ndaa ínima.

²⁸ Jáchi jonáá va jáxinu coo Ndióxi tuhun a ta anda jávi caja vii a saḥa tóco ndihi ñayivi ndúu ñuyívi”, ñacachi Isaías.

²⁹ Ta já ñacachi tucu Isaías já sanahá:

Tá quiahva ñacaja Ndióxi najándihi a sahá ñayivi ñuu Sodoma xihín ñuu Gomorra quiahva já caja Ndióxi jándihi a saḥa yo, nduu.

Joo sahá ña natahvi ini Ndióxi sahá na Israel sahá ña cán quéa coó najándihi a sahá ná, já cáchí tuhun Ndióxi.

Ndítahan nuú na Israel candeé ini na Jesucristo

³⁰ Ña cán quéa ndícani i nu ndo sahá ñayivi, na coó naquixi chíchi Israel. Co ndínducú na nduu ndaa na nu Ndióxi joo tá naçasahá na candeé ini na Jesucristo já naçaja Ndióxi ña ná nduu ndaa na nu mé á.

³¹ Joo ñayivi Israel cája na ña sáhdá ley Moisés xihín ndinuhu ini na jáchí cáhán na cuu nduu ndaa na nu Ndióxi sahá ña sácú vaha na ley Moisés. Joo coó naçuu nduu ndaa na nu Ndióxi xihín ña yóho.

³² Já nandoho na Israel jáchí nanditahan nu ná candeé ini na Jesucristo. Xihín ndinuhu ini na cája na ña cáchí ley joo coó naçuu nduu ndaa na nu Ndióxi xihín ñaha cája na. Ña cán quéa cúu ná tátuhun in na naçachihin sahá xihín yuu cáhnu.

³³ Jáchí cáchí tuhun Ndióxi ña cúu Jesucristo tátuhun yuu cáhnu nu cáchihin sahá ñayivi. Já cáchí tuhun Ndióxi já:

Naçacu yehe in yuu tóto cáhnu ñuu Sión ta xihín yuu cáhnu cán cuaha ná cachihin sahá.

Joo ndá na ná candeé ini mé a naçindahá i, na cán cúu ná na a cáçahan nuu, já naçachi tuhun Ndióxi.

10

¹ Cuni joho vaha ndó, ñani i, na cúu cuéntá Jesús. Jáchí ndinuhu ini i xíca tahví i nu Ndióxi sahá ñayivi Israel ña ná candeé ini na Jesús já ná cuu jáçacu Ndióxi na nuú cuachi na.

² Mé a ndaa ná caħan i xihín ndo ña cája cáhnu na Israel Ndióxi xihín ndinuhu ini na joo co cándaã cáxi ini na ña cúni Ndióxi caja na.

³ Jáchi co xíni na ndaja cája Ndióxi ña ná nduu ndaa ñayivi nu mé á sahá ña cán quea ndúcú na nduu ndaa na nu mé á xihín ña cája mé va na. Ta co cúni na ndiquiahva na mé ná ndáha Ndióxi ña ná caja na ña ñasacu ini mé á caja na.

⁴ Co xíni na ña ña quixi Jesucristo ta naxihí a saha yo já najáxinu coo a caja ña cáchi ley ña ná nduu ndaa tóco ndihi na cándeé ini mé á.

⁵ Saħahá ndivaha ñaħyí Moisés sahá ñayivi, na cúni nduu ndaa nu Ndióxi xihín ley Moisés. Já cáchi a já: “Ndá na co cómi cuachi nu Ndióxi, na cán cuu nduu ndaa nu mé á ta jácaacu a na”, já ñaħyí da.

⁶ Joo tá ná jácaacu Ndióxi mí sahá ña cándeé ini mé á já quea co xíni ñúhú cuhun yo indiví jánuu í Jesucristo ña ná nuu a chindeé a mí jáchi sa ñacaja mé á ña.

⁷ Ta co xíni ñúhú cuhun yo nu ndúu ínima ndii ña ná ndiquehé Jesucristo tañu na sa naxihí jáchi mé Jesucristo sa ñanditacu tucu a.

⁸ Co xíni ñúhú cuhun xíca nahá yo ndinducú yo Jesucristo jáchi ín yati ndivaha mé á nu yo jáchi ín a xoho. Ta mé tuhun cáħan nde yóho cúu á tuhun cáħan saha Jesucristo já ná candeeé ini ndó mé á.

⁹ Ta tá cachún ña cúu Jesús xitohún ta tá cándúsún xihín ndinuhu ínimun ña najánditacu Ndióxi Jesús tañu na naxihí já quea cuu caacu ndaa ínimun.

¹⁰ Jáchi tá cándeé ini ñayivi Ndióxi xihín ndinuhu ini na já nduu ndaa na caja Ndióxi. Ta tá cáħan na

xihín java ga ñayivi ña cándéé ini na mé á já quéa cuu cacu ndaa ínimā ná.

¹¹ Já cáhí tūhun Ndióxi já: “Ndá na ná candeé ini Jesús a xínu toho quiví cahán na ña najándahvi Ndióxi na.”

¹² In cúú tóco ndihi ñayivi nu Ndióxi. Tá quiahva jácācu Ndióxi na naquixi chichí Israel quiahva já jácācu a na coo naquixi chichí Israel. Jáchi sa mé Ndióxi cán cúú Ndióxi nu tóco ndihi ñayivi ta co ndáhvi cúu ini a quiahva ñaha nuú na xíca tahví nu mé á.

¹³ Já cáhí tūhun Ndióxi: “Ndá na ná cacā tahví nu Ndióxi ña ná chindeé a na, na cán cacu ndaa ínimā.”

¹⁴ Ta ndaja caja na cacā tahví na nu Jesús tá ta cámaní candeé ini na mé á. Ta ndaja caja na candeé ini na mé á tá a ñaha cuni johō na tūhun vaha cáhan saha Jesús. Ta ndaja caja na cuni johō na tūhun vaha saha Jesús tá cámaní cūhun in na caxi tūhun na ña nu ná.

¹⁵ Ta ndaja caja na cūhun na cahān na tūhun Ndióxi xihín ná tá ta co íin in na chindahá na cūhun na. Já cáhí tūhun Ndióxi já: “Ndaja ñúchí chá tá xínu coo na ñéhe tūhun vaha saha Ndióxi ña ná coo vaha í xihín mé á.”

¹⁶ Joo a juú ndihi ñayivi cándúsa tūhun Ndióxi. Ña yóho cúú á tá quiahva nacachi Isaías: “Ndióxi, mé ndó cúú ndó xitoho nde. Chá cuití ñayivi cándúsa tūhun nacāhan nde xihín ná.”

¹⁷ Jáchi jihna ñúhú cáhan na tūhun vaha saha Jesucristo nuú ñayivi ta xihín ña xini johō na cán jáxinu ini na xihín á. Andā jáví cásáhā na cándéé ini na mé á ta cája na ña cúni a.

18 Á sa naxini joho na tuhun vaha cáhan saha Jesús. Ajan. Sa naxini joho na ña. Jáchi já cáchi tuhun Ndióxi já:

Nasahan na cahan na tuhun Ndióxi nuú ñayivi, ta níí cúú sahá ñuyiví naxinu tuhun cáhan na, já cáchi tuhun Ndióxi.

19 Á nacandaá ini ñayivi Israel ña yóho. Ajan. Candaá vaha ini ná ña. Jáchi já nacahyí Moisés sanahá:

Ndióxi quéa nacachi a: Caja i ña ná candúsa na tóho yehe já ná cahihvi ini na Israel.

Ta cojo ini na xihín na tóho sahá ña cajú i ña ná candúsa mé na tóho cán yehe, nacachi tuhun Ndióxi.

20 Xihín ña yóho nasahan ndeé ini Isaías cahyí da ña nacachi Ndióxi tá nacachi a já:

Mé na co ndínducú yehe, na cán cúú na nandiñehé yehe.

Ta najánaḥa i mí i nu ná vatí coó nandaca tuhun na sahá i, nacachi tuhun Ndióxi.

21 Joo já nacachi Ndióxi sahá ñayivi Israel: “Níí tiempo cúni ndiquehe vaha i ñayivi Israel joo co cúni na quixi na nuú i jáchi sáá ini na ta co cúni na cajú na ña cúni”, nacachi tuhun Ndióxi.

11

Cája Ndióxi ñamaní xihín ñayivi Israel

¹ Ta viti ná ndaca tuhún i ndohó ña yóho: Á cáhán ndo ña najándacoo ndáḥa Ndióxi ñayivi Israel. A juú ña ndaa cúú á jáchi sa mé yehe cúú u da Israel, da naquixi chichi Abraham ta naquixi i chichi Benjamín, da nasacuu jahyi ñání jícó Abraham.

² Janda mé saha nacachi Ndióxi ña nacaxi mé á na Israel cacuu na cuéntá mé á ta co cándají a na viti. Sa xíní ndó ña nacachi tuhun Ndióxi sahá da nasacuu profeta Elías. Mé da yóho tá naxica tahví da nu Ndióxi já najácojo da cuachi jatá na Israel.

³ Já nacachi da já: “Cándehe ndo Ndióxi, xitoho i. Sa nasahní na profeta cuéntá mé ndó ta nandicani na nu náa ndo. Ta viti nú laá in túhún yehe cuití va cája ña sáhdá ndo. Ta ndúcú na cahní na yehe”, já nacachi Elías xihin Ndióxi.

⁴ Ta já nacachi Ndióxi xihin dá: “A juú in táláa yóho cája ña cúní jáchi ndúu yii va usa mil ta cája ña cúní ta coó nacaxítí na nuú tiniñu yúu Baal”, nacachi Ndióxi xihin dá.

⁵ Quiahva já ín a viti. Ndúu chá na cája ña cúní Ndióxi jáchi nacaja Ndióxi ñamaní xihin ná ta nasacu ini a jácacu a na.

⁶ Nacaxi Ndióxi na jáchi natahvi ini a saha ná. Coó nasacuu a sahá ña nacaja na jáchi tá ná cacuu a sahá ña cája na já co cúu ga ñamaní Ndióxi ta ña yóho cúu ña cúní Ndióxi caja.

⁷ Ña cán quéa cuahá ndivaha ñayivi Israel coó nanduu ndaa na nu Ndióxi sahá ña nacaja na jáchi nandaja táhyí na ínimá ná. Joo na nacaxi Ndióxi, na cán cúu na nanduu ndaa nu mé á.

⁸ Já cáhí tuhun Ndióxi já: “Co cúní na candúsa na Ndióxi sahá ña cán quéa nasaji Ndióxi xíní túni ná chí in ndeé. Ta quiahva já ndáa na janda viti jáchi co cándaá ini na ña cáhan Ndióxi xihin ná.”

⁹ Já nacahyí David sanahá:
Ná cahán na ña cuahan vaha na ichí Ndióxi sahá
cuahá ñaha cómí na,
ta ná ndoho ini na sahá cuachi cája na.

10 Ta ná cuaá nā já ná a cúní nā,
ta ná nditojo jata ná níí tiempo sahá ña vee ndójo
na, nacachi David.

Jáçacu Ndióxi nā coó naquixi chichi Israel

11 Ta viti ná ndaca tuhún i ndohó ña yóho: Á cáhán ndo ña a cuú cacu ndaa ínimā nā Israel. A juú ña ndaa cúú á. Jáchi vatí sáá ini nā Israel ta vatí co cúní nā candee ini na Jesús joo xihín ña nacaja nā yóho nanuna nuú nā tóho cuni johō na tuhun vaha saha Jesús ta já cuu cacu ndaa ínimā ná nu mé á. Ta sahá ña yóho casáhá nā Israel cahihvi ini na xihín nā tóho.

12 Nacaja Ndióxi cuahá ñamani xihin tóco ndihi nā tóho jáchi nacaja ña ná cuu ndihvi na íchi cuéntá mé á sahá ña najándacoo nā Israel íchi cuéntá mé á. Joo cuaha chága ñamani caja Ndióxi xihin tóco ndihí tá ná xinu quivi ndiquehe nā Israel íchi cuéntá mé á.

13 Joo ín in ñaha ña cúní cahan i xihin ndo, nā tóho. Ndióxi quéa nachindahá yehe tañu ndóho, nā coó naquixi chichi Israel ta chuun cáhnu ndivaha quéa ndójo i xíní i.

14 Jáchi ña cúní mí i quéa ná cahihvi ini nā Israel xihin ndo sahá tuhun Ndióxi ta já ná ndinducú mé ná Ndióxi já ná cacu ndaa ínimā nā Israel nu Ndióxi jáchi mé ná cúú ná chichi nuú naquixi mí i.

15 Nasacu xóo tóo Ndióxi nā naquixi chichi Israel jáchi nasacu ini a jándique táhan máni á tóco ndihi ñayivi ndúu ñuyíví xihin mé á. Ta tá ná xinu quivi casáhá nā Israel ndiquehe na tuhun Ndióxi cacuu a in ñaha ñúchí ndivaha. Cacuu a tátuhun casáhá

nditacu tucu na jáchĭ viti cúú ná tátuhun nā naxĭhĭ jáchĭ coó naxeén nā ndiquehe na tuhun Ndióxi.

16 Abraham nasacuu da cuéntá Ndióxi ña cán queá jahyi da, nā nacacu chĭchi da cúú ná ñayivi cuéntá Ndióxi. Abraham, da cúú cuéntá mé á cúú dá tátuhun yóho in yitó olivo. Ta ñayivi nacacu chĭchi da cúú ná cuéntá mé á ta cúú ná tátuhun ndáha mé yitó olivo cán.

17 Cúú á tátuhun nasahnda Ndióxi java ndáha, dó vaha ta nāchitivi ndaa mé á ndáha yitó olivo yúcu mé nuú nasahĭin ndáha cán. Ta viti quiahva dó ndée nu ndáha yitó olivo yúcu cán ña ná catacu dó. Quiahva já nācaja Ndióxi nasacu xóo a nā Israel ta nācaja mé á ñamani xihĭn mé ndó, nā tóho já ná nduu ndó cuéntá mé á. Ta viti cája Ndióxi cuahá ñamani xihĭn ndo tá quiahva cája xihĭn nā Israel.

18 Joo ndóhó, nā cúú nā tóho a cáhán ndo ña vaha chága mé ndó a juú ga nā Israel. Co ndítahan cahán ndo já. Co cúú ndó tátuhun yohó yító jáchĭ cúú ndó tátuhun ndáha do. Ta tá co yóho dá já queá a cúu catacu ndáha do. Sahá ña cán queá co ndítahan caja cáhnu ndó mé ndó.

19 A váha cahvi ini ndó ña náhnu chága mé ndó nu Ndióxi a juú ga nā Israel sahá ña nasacu xóo mé á nā Israel ta nasuná a íchĭ nu ndóhó candeé ini ndó mé á.

20 Cándehé ndo. Nasacu xóo Ndióxi nā Israel sahá ña coó nācandeé ini na mé á ta nāndacaxi a ndóhó sahá ña candeé ini ndó mé á ña cán queá co ndítahan caja cáhnu ndó mé ndó. Ña ndítahan caja ndó queá cayĭhvĭ ndo Ndióxi.

21 Xíní ñúhú ndicuhun ini ndó ña cuu jácaxoo tucu Ndióxi ndohó. Coó nātahnda ini a jándacoo

xóo a nā Israel, mé nā naçaxi á. Sahá ña cán quéa cachí ga ví mé ndó, nā tóhō ndáa náha caja Ndióxi cacu xóo tucu a ndohó.

²² Candehé ndo jáchi táhvi ini Ndióxi sahá ñayivi tá cándéé ini na mé á joo cuēhe ndivaha mé á xihín nā sáa ini. Ña cán quéa tá cō cándéé ini ndó mé á ta ni cō quihvi ini ndó a já cacu xóo a ndohó tá quiahva naçaja xihín nā Israel.

²³ Joo tá ná ndihvi nā Israel íchi Ndióxi candéé ini nā mé á já quéa ndiquehe tucu Ndióxi nā jáchi cuu caja mé á tóco ndihi ñaha.

²⁴ Nandiquehe Ndióxi ndohó vatí na sanduu xicá ndó nu á ta nandaja mé á ndohó cuéntá mé á vatí cúu ndó nā tóhō. Mé ndó cúu ndó tátuhun ndáha yitó olivo, dó yúcú, dó nachitivi ndaa Ndióxi tóco dó vaha. Ta ña yóho quéa a cúu coo já, nduu. Joo naçaja Ndióxi já xihín ndo. Ta ndáa náha cuu caja tucu Ndióxi xihín nā Israel ña ndiquehe tucu a nā ta cacu tucu a nā nu ndahá yitō olivo, dó vaha nuú na sandaa na jihna.

Vaxi quivi tá candéé ini nā Israel Jesús

²⁵ Ñani mí i, nā cúu cuéntá Jesús. Cúni ña ná candaa ini ndó ña naçacu ini Ndióxi caja chága chí nuu já ná a cája cáhnu ndó mé ndó. Cuahá nā Israel nandaja táhyí nā ínimā ná ta cō cúni nā ndiquehe na tuhun Ndióxi. Joo tá sa nandiquehe ndihi nā tóhō, nā naçacu ini Ndióxi jácacu a anda jáví casahá nā Israel ndiquehe na tuhun Ndióxi.

²⁶ Anda jáví cacu ndaa ínimā ndihi nā Israel. Ta já cáchí tuhun Ndióxi sahá ña yóho:

Ñuu Sión quixi in da jácacu ñayivi Israel,
nā naquixi chichi Jacob ná a cája ga nā cuachi.

27 Ta jándoo i cuachi nacaja na,

tá quiahva nacachi i xihin ná caja i, cáchí Ndióxi.

28 Tiempo viti cuahá ndivaha na Israel co cúní na tuhun vaha saha Jesús sahá ña cán quéa co cúní na Ndióxi. Joo cája na ña yóho ña ná núná nu ndóhó, na tóho já ná cuu candeé ini ndó Ndióxi. Vatí cája na Israel ña yóho joo quíhvi ini tá quíhvi ini Ndióxi na sahá tuhun nasahan nu tásáhnú jíco na.

29 Tá sahan Ndióxi ña cáchí a quiahva nu yo já quéa co ndímani mé á nuú tuhun a ta co ndícó coo a cándaa ña sahan nu yo. Ta ni co ndícó coo ini a tá sa nandacaxi a mí.

30 Sáa nasahin ini ndóhó, na tóho sanahá joo viti nacaja mé á cuahá ñamani xihin ndó sahá ña sáa ini na Israel.

31 Ta vatí sáa ini na Israel viti joo xihin ña yóho núná nu ndóhó, na tóho ndiquehe ndó ñamani Ndióxi. Joo vaxi quívi tá tahvi ini Ndióxi sahá na Israel tá quiahva natahvi ini a saha ndóhó, na tóho.

32 Nachicaji Ndióxi xini túni na Israel xihin na tóho ña ná nduu na na sáa ini. Nacaja Ndióxi ña yóho já ná cuu tahvi in nuú ini a saha tóco ndihi ñayivi.

33 Cáhnú ndivaha cúu tóco ndihi ñaha Ndióxi. Ndíchí ndivaha jini mé á ta cándaa ini a tóco ndihi ñaha. Ni in ñayivi a cuú ndicani na ña cáhvi ini Ndióxi. Ta ni in na a cuú cándaa ini ña cája Ndióxi.

34 Já cáchí tuhun Ndióxi já: “Ni in ñayivi a cuú cándaa ini na ña cáhvi ini Ndióxi. Ta ni in ñayivi a cuú jácahan na mé á caja ña ndítahan caja.

35 Coó ñayivi cája ñamani xihin Ndióxi ña ná ndaca na ña nu mé á”, cáchí tuhun Ndióxi.

³⁶ Jáchi Ndióxi quéa nacavaha tóco ndihi ñaha ta ndúu a saha mé á ta ndúu a cuénta mé á. Andá ama cáa quívi ná caja cáhnu í Ndióxi. Já ná coo.

12

Tácú yo caja chúun í cuénta Ndióxi

¹ Natahvi ini Ndióxi saha ndó, ñani mí i, na cúu cuénta Jesús. Saha ña cán quéa xíca tahví i nu ndo ña ná ndiquiahva ndó mé ndó ndáha Ndióxi já ná cacuu a tátuhun joco ndó mé ndó nu Ndióxi. Ta caja ndó tóco ndihi ña cúni Ndióxi caja ndó ña ná cajii ini a. Jáchi xihín ña yóho náha ña mé a ndaa táhyí cája cáhnu ndó Ndióxi ta ña yóho cúu á ña ndítahan nu ndó caja ndó.

² A cája ga ndó ña núu ña cája ñayivi ñuyívi. Quiahva ndó ñamani nu Ndióxi ña ná ndaja vii a xini túni ndo. Andá jávi candaá ini ndó ña cúni mé á caja ndó. Ta xihín ña yóho cuu caja ndó ña vaha ta cuu caja vatá ndó ini mé á ta cuu caja ndó ña cúni mé á xihín ndinuhu ini ndó.

³ Nacaja Ndióxi ñamani xihín i tá nacaxi a yehe. Ña cán quéa cáhan i xihín ndihi ndó ña co ndítahan cahán ndo ña cúu ndó na náhnu ndivaha joo ná cahvi ini ndó ña ndaa saha mé va ndó. Ña ndítahan caja ndó quéa coto ndojó ndo mé ndó jáchi nasacu ini Ndióxi ña ná candeé ini ndó mé á já ná cuu caja ndó ña cúni a.

⁴ Candehe ndó tá quiahva íin yiquí cuñu í. In túhún cúu yiquí cuñu í joo cuahá nuú ñaha ndáca ta sa jíin sa jíin chuun cája in in ña ndáca yiquí cuñu í.

⁵ Quiahva já in tóco ndihí, na cúu cuéntá Jesús. Sa jín sa jín chuun cája in in í joo in va cúu yo xihín Jesucristo. Ta sa jín sa jín chuun cája in in í.

⁶ Sa jín sa jín chuun nasahan Ndióxi nuú in in í caja íta mé á nasacu ini a ndá chuun quéa quiahva nuú in in í. Sahá ña cán quéa tá nasahan Ndióxi chuun nu ndó jáyaha ndó tuhun mé á nuú ñayivi, caja ndó ña xihín ndée mé á jáchi cándeé ini ndó a.

⁷ Ta tá nasahan Ndióxi chuun nu ndó ña ná chindeé ndó ñayivi já quéa ndítahan nu ndó chindeé vaha ndó na. Ta tá nasahan Ndióxi chuun nu ndó jánaha ndó ñayivi já quéa ndítahan nu ndó jánaha vaha ndó na.

⁸ Tá ta nasacu Ndióxi ini ínima ndo quiahva ndó tuhun ndeé ini na, caja ndó ña xihín ndinuhu ini ndó. Ta ndá ñaha jása ndo nuú ñayivi xíní ñúhú cajii ini ndó jása ndó ña. Ta ndá ndó ndójo chuun xíní ñúhú coo cuéntá vaha ndó xihín chuun ndójo ndó. Ta ndá ndó cátóo chindeé ñayivi ná cajii ini ndó chindeé ndó na.

Ña ndítahan caja na cúu cuéntá Jesús

⁹ Xihín ndinuhu ini ndó quihvi ini táhan ndó. Candají ndó ña núu ta caja ndó ña vaha xihín ndinuhu ini ndó.

¹⁰ Xíní ñúhú quihvi ini ndó na cúu cuéntá Jesús jáchi cúu ná tátuhun na vehe ndó ta cajii ini ndó tá caja cáhnu táhan ndó.

¹¹ Nducú ndeé ndo ta a cácuu ndó na jusá ta xihín ndinuhu ini ndó caja chúun ndó cuéntá Ndióxi, xitoho í.

¹² Xíní ñúhú cajii ini ndó candatí ndó xinu coo tuhun nasahan Ndióxi nu ndo. Quiahva ndeé

vaha ini ndó tá ndóho ini ndó ta a jándacoo ndó ña caça tahví ndo nu Ndióxi.

13 Ndá ñaha ndímani nuú java ga na cúú cuéntá Jesús ná chindeé ndó na. Ta ndiquehe vaha ndó ñayivi xító nihni ndohó.

14 Caça tahví ndo nu Ndióxi sahá na cája xíxi xihín ndo ña ná caja Ndióxi ñamani xihín ná. Caça tahví ndo nu Ndióxi saha ná ta a chícaan ndó cháhan jata ná.

15 Cajji ini ndó xihín na cájji ini ta cuacu ndó xihín na sácu.

16 In nuú quihvi ini táhan ndó. A cája ichi ini ndó. Ña ndítahan caja ndó queá jánuu ndáha ndó mé ndó xihín ñayivi ndáhvi, na co ndíñehe jícó mé. Ta a cáhan ndo ña cúú ndó na ndíchí ndivaha.

17 Tá cája núu na xihín ndó, a ndícó coo ndó caja ndó ña núu xihín ná. Joo nducú ndó quiahva caja ndó ña vaha já ná a cáhan núu ñayivi saha ndo.

18 A ndúcú ndo cani táhan ndó xihín ñayivi ta ndihí ini ndó coo vaha ndó xihín ndihi na.

19 Ñani mí i, na cúú cuéntá Jesús. Tá cája xíxi na xihín ndo a ndúcú ñehe toho ndó ña núu nu ná jáchi cojo ini Ndióxi xihín na cája já ta ndítahan nu mé á jándoho a ini na. Já cáchí tuhun Ndióxi: “Yehe ndítahan nuú jándoho i ini ñayivi, na cája ña núu”, cáchí Ndióxi.

20 Vaha chága ná caja ndó ña cáchí tuhun Ndióxi: “Tá cuíco ñayivi, na co cúní ndohó quiahva ndó ná cuxu na. Ta tá ichi ini na co cúní ndohó quiahva ndó ticuí nu ná coho na. Tá ná caja ndó ña yóho já queá cacahan nuú na cán sahá ña núu cája na xihín ndó.”

21 A quiáhva ndó ñamaní quee vaha ña quini xihín ndó. Ña ndítahan caja ndó quéa caja ndó ña vaha já ná cuu quee vaha ndó cahnu ndó ña quini.

13

1 Xíní ñúhú coo johó ndó nuú ña cáhan na jutixia xihín ndó. Jáchi sáhan Ndióxi ñamaní nuú na cán cahnda na chuun nuú ñayivi. Ta mé Ndióxi quéa nasacu a na.

2 Ta ndá na co cúní cuni johó nu sáhdá na jutixia cúu ná na sájí nuu nu Ndióxi jáchi Ndióxi quéa nasacu a na cán. Ta ndá na co cúní caja ña sáhdá na ndoho ini na.

3 Jáchi coo nasacu Ndióxi na jutixia ña ná jáyihví na ñayivi, na cája ña vaha. Nasacu Ndióxi na ña ná jáyihví na ñayivi, na cája ña núu. Tá co cúní ndó cayihví ndó na jutixia xíní ñúhú caja ndó ña vaha já ná cajii ini na jutixia xihín ndó.

4 Nasacu Ndióxi na jutixia ña ná chindeé na ndohó. Joo tá cája ndó ña núu já quéa xíní ñúhú cayihví ndó na jáchi mé na cán cahnda na chuun ña ná chahvi ndó sahá ña núu cája ndó. Sahá ña cán nasacu Ndióxi na ña ná jándoho na ini na cája ña núu.

5 Ña cán quéa ndítahan nu ndó caja ndó ña sáhdá na jutixia já ná a jándoho na ini ndó jáchi sa náha mé va xíní túni yo cahán xoho ña xíní ñúhú candúsa í ña sáhdá na jutixia nu yo.

6 Sahá ña cán quéa chahvi ndó jjuhún cuéntá impuesto jáchi sa xíní ndó ña ndítahan nu ndó chahvi ndó ña. Na jutixia cája chúun na cuéntá Ndióxi tá cája na ña xihín ndinuhu ini na.

7 Ndiquiahva ndó nuú ñayivi ña ndítahan nu ná ndiquehe na. Chahvi ndó impuesto nuú na játaca ña. Caja cáhnu ndó ñayivi, na ndítahan caja cáhnu ndó ta coo toní ñúhú ndó xihín na ndítahan coo toní ñúhú ndó xihín.

8 A cáyicá ndo ñaha nuú ni in ñayivi. Ña ndíyicá ndo queá quihvi ini táhan ndó. Jáchí ndá na quihvi ini ñayivi, na cán cúu na cája ña sáhdá ley Moisés.

9 Jáchí tá quihvi ini ndó ñani táhan ndó já queá a ndiáva ini ndó caja ndó ña núu xihín na. Ta a cáhvi ini ndó coo ndó xihín ñájíhí ñani táhan ndó. Ta a cáhni ndó ndji. Ta a cáhvi ini ndó caja cuíhná ndo ñaha inga na. Ta ni a ndiáva ini ndó cacomí ndo ñaha cómi inga na. Tá quihvi ini ndó ñani táhan ndó já queá cuni cachi a ña cája ndó ña sáhdá ley Moisés tá cáchí a já: “Quihvi ini ndó ñani táhan ndó tá quiahva quihvi ini ndó mé ndó.”

10 Ndá na quihvi ini ñani táhan, na cán cúu na cája vaha xihín ñani táhan na. Ña cán queá tá quihvi ini ñani táhan í já queá jáxinu yó nuú ña sáhdá ley Moisés.

11 Saha tóco ndihi ña cáhan í xihín ndo yóho xíní ñúhú candehé ndo ndá quiahva cáa tiempo ndúu viti. Xíní ñúhú ndicáxí vaha ini ndó caja ndó ña cuni Ndióxi jáchí viti sa nacayati chága quivi jácaacu Ndióxi mí a juú ga tá jacá nacandúsa í tuhun Ndióxi.

12 Cúu á tátuhun ja chá cuni yaha ñuú ta casáhá tivi yaa. Ña yóho cuni cachi a ña sa nacayati quivi quixi tucu Jesucristo. Ña cán queá xíní ñúhú jándacoo í ña núu cája í tátuhun cája ñayivi xica nuu naá. Ta xíní ñúhú caja í ña vaha já queá quee vaha

í xihín ña núu.

¹³ Ndísáhnú ná coo iní caja í tóco ndihi ñaha tátuhun cúu yó ña ndúu nu yéhe. A cácuú ñayivi xíhi ta ni a cája í vicó lándá ndivaha. Ta ni a cáca nuu jii yo xihín ñájíhí ñani táhan í ta a ndiáva iní coo í xihín najihí. Ta a ndúcú yo caní táhan í xihín ñani táhan í ta ni a cáhíhvi iní xihín ná.

¹⁴ Ña ndítahan caja í quéa caça chága yo ndée yo nu Jesucristo, xitoho í já ná cacuu a tátuhun candixí in jahmá caa ña sándixi da cáni táhan. Ta coto a quiáhva ndó ñamaní nuú yiquí cuñu ndó caja ña núu.

14

Cō ndítahan candehé ndaa táhan í

¹ Ndiqhehe vaha ndó ña cúu cuéntá Jesús vatí cō cándaá vaha iní na ña jánaḥa tuhun Ndióxi. Ta a cáni táhan yúhu ndó xihín ná sahá ña cándúsa na.

² Íin java ña cúu cuéntá Jesús cáhán ña ña cuu cuxu na cuñu, ña najoco ña nuú yoco. Joo java ña cúu cuéntá Jesús, ña saá xihín tuhun Ndióxi cáhán ña ña a cúu toho cuxu na cuñu, ña najoco ña nuú yoco sahá ña cán quéa cō xíxi na ña.

³ Ña xíxi mé cuñu cán cō ndítahan nu ná candehé ndaa na ña cō xíxi ña ta ña cō xíxi cuñu cán cō ndítahan nu ná candehé ndaa na ña xíxi ña. Jáchí ndíqhehe vaha Ndióxi ndíví ña cán vatí sa jíin cáhán na.

⁴ Ta quiáhva já cō ndítahan nu ndó candehé ndaa ndó mozo ñani táhan ndó á cája vaha da á cō cája vaha da nuú xitoho da. Vaha ri caja vaha da tá vaha ri cō cája vaha da jáchí mé va xitoho da cán

xíni sahá ña cán. Joo cuu caja Ndióxi ña ná candoo vaha mozo cán nuú xitoho da.

⁵ Java ñayivi cáchi na ña ín quivi náhnu chága nuú java ga quivi. Ta java na cáchi na ña in cúu tóco ndihi quivi. Ta ndítahan nuú in in na caxi na ña cáhvi ini na sahá ña yóho.

⁶ Tá sácú ini na caxi na in quivi caja cáhnu na Ndióxi ta vaha va cája na. Ta tá cáhán na cuu caja cáhnu na Ndióxi ndá quiví nacuu va ta vaha ri já va. Ta vatí xíxi na cuñu, ña sa najoco na nuú yoco á co xíxi toho na ña joo ndíquiahva na ndixahvi nu Ndióxi sahá ta xihín ña yóho cája cáhnu na mé á.

⁷ Ni in yó co tácu saha mí ta ni in yó co xihí saha mí.

⁸ Ta tá tácu yo á tá naxihí yo mé a ndaa cúu yó na cómi Ndióxi cuénta saha ta cúu mé á xitoho í.

⁹ Sahá ña cán quéa naxihí Jesucristo ta nanditacu tucu a já nanduu a xitoho ñayivi, na tácu xihín na sa naxihí.

¹⁰ Ña cán quéa a váha toho cája ndó tá sándehe ndaa ndó ñani táhan ndó. A váha caja ndó candají ndó na jáchi vaxi quivi ndique táhan ndihí candita í nu Ndióxi ña caja víi a saha yo.

¹¹ Jáchi já cáchi tuhun Ndióxi já:
Yóho ín i cáchi i xihín ndo ña xinu quiví ndica xítí
tóco ndihi ñayivi nuú i,
ta casáha na caja cáhnu na yehe, ña cúu Ndióxi,
cáchi Ndióxi, xitoho í.

¹² Jáchi ndítahan nuú in in í ndiquiahva í cuénta sahá ña nacaja í nu Ndióxi.

A cája ndó ñaha ña cuu jándicava ñayivi nuú cuachi

13 Sahá ña cán quéa cō ndítahan candehé ndaa táhan í. A cáciu ini ndó caja ndó ñaha, ña cuu jándacava na cúu cuéntá Jesús nuú cuachi ta já ná jándacoo na ña cándéé ini na Ndióxi.

14 Sahá ña cándéé ini i Jesús, xitoho i sahá ña cán quéa cándaã vaha ini i ña cō cája i cuachi tá xíxi i ña najoco na nuú yoco. Joo tá ndúu na cáhán ña a váha toho cuxu na ña já quéa cō ndítahan cuxu na ña jáchi cuu candojo na cuachi sahá tá ná cuxu na ña.

15 Joo tá ndíhivi ñanún, na cúu cuéntá Jesús sahá ñaha xísún já quéa cúní cachi a ña cándajún na. Cuéntá coún ná a cájún ña ndicava na cán nuú cuachi sahá ña xísún jáchi cúu ná na naxihí Jesucristo saha.

16 Vatí cándaã ini ndó ña cuu cuxu ndó ña najoco na nuú yoco joo a cúxu toho ndó ña tá ná cahan núu ñayivi sahá ña cája ndó.

17 Jáchi a juú sahá ña xíxi ni sahá ña xihí cacomí Ndióxi cuéntá saha yo. Ña cúní Ndióxi caja í quéa ná canduu ndaa yo nu mé á ta ná coo vaha iní xihín ñayivi ta ná cajii iní. Tóco ndihi ña yóho cúu á ña quixi nu ínimã yii Ndióxi.

18 Tá ná caja ndó ña yóho já quéa caja cáhnu ndó Jesucristo ta cajii iní Ndióxi caja ndó ta candoo vaha ndó nuú ñayivi.

19 Ña cán quéa xíní ñúhú ndinducú yo tóco ndihi ñaha, ña cuu candaca mí canduu táji yo xihín ñani táhan í ta já ná cuu jácuahnu táhan í xihín ñaha Ndióxi.

20 Nasacu ini Ndióxi jácacu a ñayivi sahá ña cán quéa coto a cájí nuu ndó nuú ña cúní Ndióxi caja

sahá ñaha xíxi ndó. Mé a ndaa tóco ndihi ñaha cúu á ña vaha cuxú. Ña co váha quéa jándacava í ñayivi nuú cuachi sahá ña xíxi.

²¹ Vaha chága ná a cúxu ndó cuñu ta ni a cóho ndó vino ta ni a cája ndó inga ñaha ña cuu jándacava ñani táhan ndó nuú cuachi.

²² Tá ta cánda a cáxi ini ndó ña co cája ndó cuachi nu Ndióxi, a ndícani ndó ña nuú java ga ñayivi. Jáchi tahví nacuu ñayivi tá xíni na co cája na cuachi nu Ndióxi.

²³ Joo ndá na ndúcú cuxu in ñaha ta cáhvi ivi joho ini na xihin á tá xíxi na ña já quéa xínu cuachi jata ná. Jáchi ndá ñaha nacuu ná caja í ta tá ta cándúsa yó ña cúu á cuachi já quéa xínu a cacuu a cuachi nu yo.

15

Chindeé ndó na cáhvi ivi joho ini

¹ Tá ndacú cuahan yó xihin tuhun Ndióxi já quéa co ndítahan cacu xóo í na vitá xihin tuhun Ndióxi. A ndúcú ndo caja ndó ña jándivaha ini mé cuití va ndó.

² Tóco ndihí xíni ñúhú caja í ñaha ña táhan ini ñani táhan í xihin. Ta xíni ñúhú caja í ña já ná chindeé yó na ña ná canduu vaha na ta já ná cuu cuahnu chága na xihin tuhun Ndióxi.

³ Jáchi mé Jesucristo coo nanducú a caja ña táhan ini mé cuití a. Ña nacaja mé á quéa najaxinu coo a nuú tuhun Ndióxi tá nacachi a já: “Tuhun núu ña najacana na nu mé ndó naxinu ri a jatá yehe viti.”

⁴ Tóco ndihi ña nacahyi nuú tuhun Ndióxi sanahá nacahyi a já ná jánahá nu yo ña co ndítahan ndicani iní. Ta, náha ña ndítahan quiahva tuhun

ndeé iní nani ndátí jáxinu Ndióxi tūhun naśahan nu yo.

⁵ Ndióxi quéa śahan ndée nu yo ña ná coo cáhnu iní ta sa mé á śahan tūhun ndeé iní. Ña cúni Ndióxi quéa chindeé a ndohó caja ndó tá quiahva naćaja Jesucristo ta já in ná nduu xihín táhan ndó.

⁶ Ta já in ná jándique táhan ndihí caja cáhnu í Ndióxi, mé a cúu tátá Jesucristo, xitoho í.

Xínijoho na coó naquixi chichi Israel tūhun vaha saha Jesús

⁷ Ndiq̄uehe vaha ndó tóco ndihi na cúu cuéntá Jesús tá quiahva nandiquehe vaha Jesucristo ndohó já ná ndicáhnu Ndióxi.

⁸ Ndítahan ndicūhun ini ndó ña naquixi Jesucristo chindeé a ñayivi Israel. Ta naquixi a jánaħa nu ná ña mé a ndaa táhyí jáxinu coo Ndióxi tóco ndihi nuú tūhun ña naśahan nuú tásáħnu jícó yo jáchi co ndímaní Ndióxi nuú tūhun a.

⁹ Ta naquixi a jácaacu a ñayivi, na coó naquixi chichi Israel ña ná caja cáhnu na mé á saħá ñamaní naćaja mé á xihín ná. Jáchi já cáhí tūhun Ndióxi: Yeħe xihín na coó naquixi chichi Israel caja cáhnu nde ndohó, Ndióxi,

ta yeħe cata i nu ndo caja cáhnu i quivi ndo.

¹⁰ Ta ín inga tucu nu cáhí a já:

Ndohó, na coó naquixi chichi Israel xíní ñúħú ndique táhan ndó cajji ini ndó xihín na naquixi chichi Israel.

¹¹ Añda já naćachi tucu a já:

Tóco ndihi ndó, na coó naquixi chichi Israel caja cáhnu ndó Ndióxi, xitoho í,

ta ná a jándacoo toho ndihi ñayivi caja cáhnu na Ndióxi.

12 Tá naçahyí Isaías nuú tũhun Ndióxi já naçahyí da tũhun yóho:

Vaxi quivi cacu in da chichi Isaí,

ña ná cacomí da cuénta sahá ñayivi, na coo naquixi chichi Israel.

Ta mé ñayivi yóho candeé ini na mé da quixi chichi Isaí cán.

13 Ndióxi quéa cája ña ná candeé ini ndó mé á ta já cuu jácacu a ndohó. Ná caja mé á ña ná ndicutú ini ndó xihín ña caji ini ndó ta ná caja mé á ña ná coo vaha ini ndó jáchi candeé ini ndó a. Xihin ndée ínima yii Ndióxi ná quiahva mé á cuaha ndée nu ndó candeé chága ini ndó a.

14 Cándehé ndó ñani i, na cúu cuénta Jesús. Sa xini vaha i ña nachutú ndo xihín ña vaha ta cánda vaha ini ndó tũhun Ndióxi. Ta xihín ña jan cuu jánaha táhan ndó.

15 Joo tá naçahyí i carta yóho nu ndo já naçaja ndeé ini i cáhyí i saha java ñaha jáchi co cuni ña ná ndindójó ndo ña. Cáhyí i ña yóho jáchi naçaja Ndióxi ñamani xihín i

16 cája chúun i cuénta Jesucristo cáxi tũhun i tũhun vaha saha mé á nuú ñayivi, na coo naquixi chichi Israel. Ta cúu u tátũhun jutũ jáchi xica i cáhan i tũhun Ndióxi xihin ná já ná cuu çacu ndaa ínima ná. Cúu á tátũhun jóco i na nu Ndióxi já ná caji ini mé á xihin ná ta já ná cuu ndaja ínima yii mé á ña ná nduu na ñayivi vii nu mé á.

17 Ta sahá ña cándúsa i Jesucristo sahá ña cán quéa ndivaha ini i caja chúun i cuénta Ndióxi.

18 Jáchí sáhan ndeé ini i cáhan i sahá ña ñacaja Jesucristo tá ñacaja chúun mé á yehe ña candaca i na coó ñaquixi chichi Israel ña ná caja na ña cúní Ndióxi. Ta sahá ña ñacahan i xihín na cán já ñaxini johó na ta ñacaja na ña cáchí tuhun Ndióxi.

19 Ta sa ñaxini na ña xitúhún xihín ña náhnú ndivaha ñacaja i nu ná xihín ndée ínima yíi Ndióxi. Ta quiahva já ñacaxi tuhun i tuhun vaha saha Jesucristo nuú ñayivi ndúu ñuu Jerusalén xihín nu tóco ndihi na ndúu ndijáá ñuu anda estado Ilirico.

20 Ña ndúcú u caja i queá cahan i xihín ñayivi ña cúní Ndióxi jácacu a na. Ta sá cahan i ña yóho nuú ñayivi, na a ñáha cuni johó saha Jesucristo jáchí co cúní ndiquehe e chuun ña sa najácava sáhá inga na.

21 Cáhvi ini i ña vaha chága ná cuhun i nuú ñayivi, na coó ñaxini johó tuhun vaha saha Jesús jáchí já cáchí tuhun Ndióxi já:

Vatí coó ñaxini johó na tuhun vaha saha mé á joo vaxi quivi xinu coó na cahan xihín ná, ña ná cándaá ini na ña coó ñacandaá ini na jihna, cáchí tuhun Ndióxi.

Sácú ini Pablo cuhun da ñuu Roma

22 Ta sahá chuun cája i yóho coó ñacuu saa i coto nihni i ndohó vatí sa cuahá tañu nasacu ini i saa i jan.

23 Joo viti sa najándihi i chuun ñacaja i tañu ñayivi ndúu yóho. Ta sa cáhvi ini i saa i coto nihni i ndohó anda sanahá.

24 Sahá ña cán queá sácú ini i saa i coto nihni i ndohó tá ná yaha i cuhun i chí España. Ta tá ná ndihi cajii ini i cuni i ndohó anda jáví ndiquehe

tucu u íchi cuhun i. Joo cúni ña ná chindeé ndó yehe já ná cuu ndiquehe tucu u íchi cuhun i.

²⁵ Joo viti cuhun i chí ñuu Jerusalén chindeé na cúu cuéntá Jesús ndúu cán.

²⁶ Jáchi na cúu cuéntá Jesús ndúu estado Macedonia xihín na ndúu estado Acaya nasacu ini na játaca na jjuhún ta chindahá na ña nuú na cúu cuéntá Jesús, na cándahví ndúu ñuu Jerusalén.

²⁷ Mé na tóho yóho nasacu ini na caja na ña ta vaha cája na jáchi cáhán na ña ndítahan nu ná chahvi na sahá ña nacaja na Israel, mé na cúu cuéntá Jesús ndúu ñuu Jerusalén xihín ná. Jáchi nasahan na Israel nacaxi tuhun na tuhun vaha saha Jesús nu ná. Ta viti ndúcú ñehe na tóho yóho ñamani nacaja na Israel xihín ná. Ña cán quéa chindeé ñahá na toho xihín ña cómi na.

²⁸ Ta tá sa najándihi i caja i chuun yóho ta tá sa nandihí ndiquiahva i jjuhún nataca na tóho nuú na cúu cuéntá Jesús ndúu ñuu Jerusalén anda já nuná nuú i cuhun i España ta já vaha i jan coto nihni i ndohó.

²⁹ Ta xíni vaha i ña tá ná saa i jan caja Jesucristo cuahá ñamani xihín ndo sahá tuhun vaha cahan i xihín ndo.

³⁰ Xíca tahví i nu ndo ñani mí i, na cúu cuéntá Jesús, ña in nuú ná caça tahví yo nu Ndióxi sahá chuun cája i. Jáchi cándéé ini ndó Jesucristo ta quíhvi ini ndo yehe nacaja ínima yii Ndióxi.

³¹ Caça tahví ndo nu á ña ná chindeé a yehe ná a cája ñayivi, na co cándúsa Ndióxi ndúu estado Judea ni in ñaha xihín i. Ta caça tahví ndo nu Ndióxi ña ná candúsa na cúu cuéntá Jesús ndúu ñuu Jerusalén cán ndiquehe vaha na jjuhún ñehe

cuahan i nu ná.

³² Já quéa tá ná cúni Ndióxi já cajii ini i saa i coto nihni i ndohó ta ndiquehe ndeé e nani xíto nihni i ndohó.

³³ Ndióxi ná coo xihin ndo ta ná caja mé á ña ná coo vaha ini ndó. Já ná coo.

16

Chíndahá Pablo Ndióxi coo na ndúu ñuu Roma

¹ Ja chá va casaa ña naní Febe, ña cúu cuéntá Jesús nu ndo. Mé Febe yóho ñacaja chúun ña veñuhu Cencrea.

² Caja ndó ñamani ndiquehe vaha ndó ña sahá ña cúu ña cuéntá Jesús, xitoho í ta já ndítahan caja na cándéé ini Jesús. Chindeé ndó ña yóho xihin ndihi ñaha ña cámani nu ña jáchi nachindeé ña cuahá ndivaha ñayivi ta nachindeé ri ña yehe va.

³ Chíndahá i Ndióxi coo Priscila xihin Aquila jáchi in cúu ná xihin i cája chúun na cuéntá Jesucristo.

⁴ Mé na yóho ñasahin tiahva na quivi na já ná cuu cacu yehe tá ñaquixi tondóhó nuú i. Ta a juú in túhún yehe ndíquiahva ndixahvi nu ná vaha. Tóco ndihi na cúu cuéntá Jesús, na coó ñaquixi chichi Israel ndíquiahva na ndixahvi nu ná.

⁵ Ta jári chíndahá i Ndióxi coo na cúu cuéntá Jesús, na ndíque táhan vehe Priscila xihin Aquila. Ta cahan Ndióxi ndó xihin Epeneto jáchi quíhvi ndivaha ini i da. Mé dá ñasacuu da nu cuítí ñandihvi íchi cuéntá Jesús estado Acaya.

⁶ Ta cahan Ndióxi ndó xihin María, ña chindeé cuahá ndohó.

⁷ Ta chíndahá i Ndióxi coo Andrónico xihin Ju-nias. Ndívi da yóho cúu dá da ñaquixi chichi nuú

naquixi mí i. Ta in nasañuhu nde vecaa xihin dá. Ta cúu dá da náhnu tañu na apóstol. Ta jihna ñuhú ndíví mé da yóho nacasáhá cándúsa da Jesucristo a juú ga yehe.

⁸ Ta cahan Ndióxi ndó xihin Amplias jáchi quíhvi ndivaha ini i da. Ta in cúu nde cuéntá Jesús.

⁹ Ta chindahá i Ndióxi coo Urbano. In cúu mé dá xihín nde cája chúun da xihín nde cuéntá Jesucristo. Ta chindahá i Ndióxi coo Estaquis, da quíhvi ndivaha ini i.

¹⁰ Ta chindahá i Ndióxi coo Apeles jáchi cuahá tañu najána ha da nuú ñayivi ña mé a ndaa táhyí cándeé cáhnu ini da Jesucristo. Ta quiahva já chindahá i Ndióxi coo na vehe Aristóbulo.

¹¹ Ta cahan Ndióxi ndó xihin Herodión jáchi in naquixi nde chichi Israel. Ta cahan Ndióxi ndó xihín na vehe Narciso jáchi cándúsa na Jesús, xitoho í.

¹² Ta cahan Ndióxi ndó xihin Trifena ta xihin Trifosa, na cája chúun cuéntá Jesucristo, xitoho í. Ta cahan Ndióxi ndó xihin Pérsida, jáchi quíhvi ndivaha ini i ña ta cuahá ndivaha nacaja chúun ñá cuéntá Jesucristo, xitoho í.

¹³ Ta cahan Ndióxi ndó xihin Rufo jáchi cúu dá da cáhnu ndivaha tañu na cúu cuéntá Jesús. Ta cahan Ndióxi ndó xihin náná da jáchi cúu ñá tátuhun náná mí i viti.

¹⁴ Ta chindahá i Ndióxi coo Asíncrito xihin Flegonte xihin Hermas xihin Patrobas xihin Hermes. Ta chindahá i Ndióxi coo tóco ndihi na cúu cuéntá Jesús ndúu xihín na cán.

¹⁵ Ta cahan Ndióxi ndó xihin Filólogo xihin Julia xihin Nereo ta xihín quiahva da. Ta cahan Ndióxi

ndó xih̄in Olimp̄as ta xih̄in tóco ndihi n̄a cúu cuéntá Jesús ndúu xih̄in n̄a cán.

16 Ñ̄a cúni qūea ná caḥan Ndióxi xih̄in táhan ndó ta ná tatí yúhu táhan ndó ta yii caja ndó ñ̄a. Tóco ndihi n̄a cúu cuéntá Jesús, n̄a táca veñuhu yóho chindahá n̄a Ndióxi coo ndihi ndó.

17 Cándehé ndó ñ̄ani mí i, n̄a cúu cuéntá Jesús. Xíca tahví i nu ndo ñ̄a ná coo cuéntá ndó xih̄in n̄a cátoó ndicahnda ñ̄ayivi, n̄a cúu cuéntá Jesús jáchi sáji nuu na nuú n̄a cája ñ̄a cúni Ndióxi. Ñ̄a cája n̄a jan qūea cáxoo na nuú ñ̄a najánaḥa nde nu ndo. Coto a cátaḥan ndó xih̄in ná.

18 Jáchi mé n̄a yóho co cúu ná n̄a cája chúun cuéntá Jesucristo, xitoho í. Ñ̄a cája na qūea ndúcú n̄a ñ̄a vaḥa mé cuití va na. Ta xih̄in tuhun ñ̄uchí ta xih̄in tuhun víi jándahvi na ñ̄ayivi, n̄a co tácu vaḥa ini.

19 Tóco ndihi ñ̄ayivi xini n̄a ñ̄a cája ndó ñ̄a cúni Ndióxi ñ̄a cán qūea cájii ndivaḥa ini i. Ñ̄a cúni qūea ná naḥa ndó ñ̄a ndíchí jini ndo xih̄in ñ̄a vaḥa cája ndó. Ta a cáñuhu ini ndó caja ndó ñ̄a núu.

20 Yachi chá jándihi Ndióxi saḥá Satanás, rí cúu tiñáhá sacuaḥa ta já cuu cañu ndó ri xih̄in ndée Ndióxi. Cacuu a tátuhun chiníhni saḥa ndó ri. Ná caja Ndióxi ñ̄a ná coo vaḥa ini ndó. Ta ná caja cuaḥá Jesucristo, xitoho í ñ̄amani xih̄in ndihi ndo.

21 Chindahá Timoteo Ndióxi coo ndó ta in cúu dá cája chúun da xih̄in i. Ta chindahá ri Lucio xih̄in Jasón xih̄in Sosípater Ndióxi coo ndó. Tóco ndihi da yóho naquixi da chichi Israel nuú naquixi mí i.

22 Yeḥe naní Tercio ta cáhyí i carta yóho ta chindahá ri yeḥe va Ndióxi coo ndó cuéntá Jesucristo, xitoho í.

²³ Chindahá Gayo Ndióxi coo ndó. Vehe mé dá ín i ta sa mé yóho táca na cúu cuéntá Jesús. Ta chindahá ri da naní Erasto Ndióxi coo ndó. Mé Erasto cómi da cuéntá sahá jjuhún ñuu yóho. Ta chindahá ri Cuarto, da cúu cuéntá Jesús Ndióxi coo ndó.

²⁴ Ná caja cuahá Jesucristo, xitoho í ñamaní xihín ndihi ndó. Já ná coo.

Cája cáhnu Pablo Ndióxi

²⁵ Coho caja cáhnu í Ndióxi jáchi mé á cuu ndaja ndacú a ndohó xihín tuhun vaha saha Jesús ña jánaha nde nu ndo. Anda sanaha tá cámani cava sahá saha ñuyívi nasacu ini Ndióxi jácacu a ndohó ta viti naxinu quivi jánaha mé á ña nu ndo. Nahá ndivaha nasahin jehé tuhun vaha saha Jesús.

²⁶ Ta viti cándaá iní ña nacañan Ndióxi saha Jesús nuú na profeta ta na yóho nacañyí na ña nuú tutu. Ta nasahnda Ndióxi chuun nuú na cúu cuéntá mé á ña ná cahun na caxi tuhun na ña nu tóco ndihi ñayivi ndúu ñuyívi. Ta xihín mé ña yóho nacaja Ndióxi ña ná cuu candeé ini ñayivi mé á ta já ná caja na ña cúní a, mé a tácu anda ama cáa quivi.

²⁷ Ta mé cuití va cúu Ndióxi ta mé cuití va ndíchí jiní sahá ña cán queá ndítahan caja cáhnu yó a anda ama cáa quivi sahá ña nacaja Jesucristo, xitoho í. Já ná coo.

**Tuhun saá ña najá^{ndacoo} Jesucristo nu yo: El
Nuevo Testamento en el mixteco de
Silacayoapan
New Testament in Mixtec, Silacayoapan
(MX:mks:Mixtec, Silacayoapan)**

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

7f2d3ecf-6d15-55a5-9081-6e970474df2f